

王衮知兗州

勅具官某吏道以律令為師然讀其書誦其數而不知所以行之未足與言治也爾明習三尺出守列郡臨長吏民知弛張之方有循良之譽急於親養來請鄉邦朕不爾違以勸能吏祇服休命益勉無怠可

馮宗道遥郡刺史

勅朕嚴內外之分飭左右之戒是以近習之臣雖才智敏強見於內廷而外無知者具官某蚤蒙器使薦經事任出入諸道靖而不煩比緣積勞之久擢參後省之秘而重慎祇肅有加於前宜因寄資之崇益以

閱月之效佩之郡印以寵貂冠勵爾在公清我襟帶可

胡田

先以官苑副使知誠州改為軍除為知軍

勅某沅誠皆南邊新郡而誠之於沅地不能半官吏兵丁餽餉勞止比因有司之請易以軍壘之稱爾因領舊治以撫遠民均為長吏毋以名號之殊為輕重之意可

陳安石知襄州

勅襄陽古都會也山河雄勝居楚越之上游風俗剽悍兼雍洛之餘習在戰國為用武之地方承平為無

事之國牧守之勝圖謀具在具官某起自世族華髮
一心試之中外清節可紀比者解印西土持節南陽
坐席未溫捧詔入覲眷荊州之重地方守臣之闕人
匪為爾私將適民望勉圖安靜之術思繼循良之風
可

孫懷用知寧化軍郝逢知奇嵐軍

勅具官某等嵐谷固軍皆樓煩之故地民事雖簡而
邊政為重守土之吏必慎所付爾等咸以選任習於
疆場之政惟思與信可以附吾民而服隣國勉思訓
言無怠於事可

王念光祿寺丞

勅某政無大小以得人為重雖復膳羞之未足效才
否之實爾久試於外而來居此勉修厥職毋忝朕命
可

姚勗秘書丞

勅具官某爾以清節懿行聞於鄉黨公卿譽者交至
於前乃者擢丞宗正實刊玉牒顧惟東觀之重號為
衆材之委往服厥職益懋乃德以稱予待爾之意可
蒲宗閔知興元府史宗範知廬州

勅具官某等漢中蜀之大都而合肥楚之奧壤守臣

之選不在有司以爾宗閔入治郎曹出將使指以爾宗範踐歷藩屏宜於吏民因其已試之效付以共理之柄往祇厥服俾二郡之民被愷悌之政以助予治可

林顏權知泉州

勅某祿廩之給官有常日爾奉使於外而取逾於法以致人言將何以率勵群吏責之廉節乎宜罷所領假守方州祇服寬憲修省無怠可

孔平仲太常博士

勅具官某刑政之得失衆人知之然其所與壞止於其事而已禮樂之得失視之未必見也而治忽之端或自是起故朕於奉常之官擇之必慎用之亦速爾以儒術精博吏治通敏以在茲選其克爲朕別嫌明微以詔爾長俾上下內外不愆于舊章則爾職舉矣可

西蕃首領温溪心心牟欽羶二人並除化外州

團練

勅具官某等天之於人善惡必報朕上法天道以爵命四方有能忠勤必保富貴爾等才雄諸部心奉本朝審於禍福之原明於逆順之理團兵寵秩蓋旌守

節之堅絕等異恩當俟成功之報可

鄭侑知單州

勅某公卿之世有列於朝不患不用而患不立爾名臣之後以詞藝自奮入佐卿寺出典藩服由河內領單父恩亦厚矣毋忝乃祖勉思所以報者可

孫之敏知雍丘楊瓌寶知咸平

勅某等畿邑大夫古所謂內諸侯也仰有朝廷俯有吏民善惡之効朝夕可見以爾之敏家世名臣才穎自著以爾瓌寶宦學歷歲志節不回試以鄉遂之民將觀政事之實在邦必達爾尚勉之可

許懋右司郎中

勅某萬幾出納萃於中臺詔敕稽停文案壅滯自唐貞觀之盛而患之矣矧今俗弊政煩實倍前世雖上有管轄而郎不得人罔與共濟以爾奮自周行亟更劇務強敏樂易所至有成是以召自南服還領右部尚能體予不次之舉勉盡匪躬之節虛位以俟爾其欽哉可

陳軒主客郎中

勅某春官之屬皆郎之清選也爾昔以文藝發身名在甲乙中以靖退補外安於遐逝還朝已久素守不

逾今典祠溢員而司藩虛位祇服朕命往勤厥官可
豐稷殿中侍御史

勅具官某孔子稱有德者必有言德之無素而言以
爲責則言有失當而聽者惑矣爾昔爲御史不得其
言而去出使諸道入居郎曹端良之聲予有聞焉其
尚一乃心時有德音來告俾予一人獲聽德之助可

陳知晦蔡州簽判

勅具官某五世舊臣百年遺老求之於時蓋無幾矣
今其子弟官於四方左右莫與爲養大臣來告惻焉
疚懷以爾篤於孝弟服勤無斁雖從事汝南疑於左
遷而朝夕之奉實惟汝志可

向宗旦司農少卿

勅具官某司農掌倉庾委積舟楫苑囿之政令以時
行視吏卒因其勤惰而正其黜陟蓋亦勞矣異時二
卿共事猶或不給今萃于一安得不告勞乎爾以世
家之盛兼外戚之寵而仕由科舉官有風迹往爲之
少俾群司競勸衆務咸舉以稱朕命可

侯利建京東漕井亮采河東漕

勅具官某等齊魯之富甲於四方而連歲水旱民艱
於食盜賊將起汾晉之貧甚於西邊而逮秋豐成粒

米狼戾收歛爲急朕思得良使者以濟二方之宜以爾利建忠節強勁安靖不擾以爾亮采才力敏濟察舉有方卓然已試之效庶幾諸道之選往祇厥服使民食無匱而邊儲有繼此予所以命汝意也可

馬城湖北憲

勅某爾轉漕汾晉之間以羨補不足歷年于茲亦既勞矣荆楚雖遠而庶獄之治方漕爲簡其克清心慎聽使江漢之間無冤愬之民以答恩寵可

林積知福州

勅某長樂大藩七閩之冠衣冠之盛甲於東南工商之饒利盡山海然以地狹故民多不足俗巧故吏或不稱爾旣生於其鄉長習爲政歷試列郡服勞諸卿今予命爾懷組而歸非獨觀榮於故鄉蓋將責實於來效可

朱服權發遣泉州

勅某爾昔嘗備左右史矣出蒞京口于今再朞朕比以常法遷爾長樂而有司言爾事親不謹爲吏不職朕方以恕臨物不忍究也清源大府往爲假守內飾孝弟之行外循律令之禁日夜不忘庶免來咎可

林顏知濠州

勅某汝奉使閩越不聞令譽而臨財弗慎以致煩言朕因其悔過待以寬憲而公議不置封章繼聞濠雖小邦有民與社服我恩貸勿忘省循可

令翬以率府率講書授通直郎

勅某先皇帝厚於宗室勉以爲善有能通於經術率常試以吏事爾誦習典謨明其義訓往服通籍之寵以爲維城之勸可

張密古知登州

勅某文登濱海有邊防之責士出守其地非選不授爾服勤南宮以積勞而往勉自修飭無忝明命可

高遵易改知全州

勅某黔南雖遠而任寄爲重爾以親往憚於嶮艱改命清湘以安祿養孝治之篤豈惟爾私可

何琬工部郎中

勅某昔漢宣帝信賞必罰綜核名實至於技巧工匠器械元成之間鮮復能及永惟熙寧元豐之政其微見於百工之事與漢宣比朕雖繼之以恭儉而至於練精之功其可忘之爾歷使諸道吏能有聞入贊冬官勵精度務勉循舊章以毋失其故可

崔公度知潁州

勅某汝陰土沃民夥有魚稻之饒而訟訴之煩亦倍他郡守得其人則湖山之勝足以爲樂苟非其人犴獄煩多日不遑給爾蚤以文詞備選更踐吏事亦云久矣勉勤政事毋爲頽俗所撓以稱朕命可

黃袍知賓州錢師孟知橫州

勅具官某等嶺南諸郡土曠民稀而密邇夷落以疆場之政爲重故守土之吏常選於右府以爾袍仕至通籍而帥臣任以軍政以爾師孟雖爲勇爵而習於文法之治安城寧浦有民有兵其先爲安靖以待外侮知予所以命爾之意可

石景略可宣德郎

勅具官某朝廷因唐之故以六曹寺監綱紀百執事之治凡祖宗法令之舊合散出入有司有不能知者是以分命近臣條祈爲書於茲歷年爾與有勞焉功雖未究而考應於格舉自縣令寘之通階毋郡邑之勞而被斯寵爾其勉之可

范純禮發運副使

勅具官某慶曆名臣莫如文正之賢者朕訪其後人寘之於朝如見遺老以爾慎靖而文肅恪而通能世其家是以擢於文昌之要付以禮樂之事而乃畏避

權寵自嫌閹閹東南漕事國用之根本任人之重朝廷難之均通有無以實中都非特私請之便實亦當今之急也可

張汝賢右司郎中

勅某東南都漕出納財賦幾半天下左右都司綜執綱紀與聞治要雖有內外之異而用人之慎其選維均爾比自文昌出總饋運治辦之稱朕用嘉之還爾舊司益勉毋怠以稱朕委寄之重可

韓宗道太府少卿朱光庭太常少卿

勅某等西漢之治以九卿爲重隋唐以來政在中臺則寺監之事蓋無幾矣然至於奉常司府禮樂財賦之所在用人之慎初無聞焉宗道奮於世族之良練達政治之要光庭比自諫諍之列出佐綱轄之司而皆敦朴自守才力有聞擢居二寺之重益觀歷試之效深自勉勵以究成功可

李之純寶文閣直學士知成都府

勅蜀雖嶮遠而民習禮義易與爲善難與爲非一遇循良懷之沒齒少加震政病不自申昔張詠出守方兵革之後撫之以義民欣戴焉道朴奉使方恭侈之餘節之以禮民安樂之及其復來於民驩呼唯恐其

去得失之效昭然著明具官某性本靖深政實寬厚處東南苗役之際簡以易從當西南征伐之衝安而弗擾遺澤猶在父老知之是以改重職於西清付遺黎於右蜀勉因舊治追繼前人毋使張趙之賢獨專巴漢之譽可

廖正乙秘書省正字

勅某朕登延備良策之翰林爾推言往古以及當世挺然不回朕甚嘉之京觀圖書之府挾冊考義游於其間者皆士之選也爾住講習道藝長育才幹敦業以待舉吾於養士亦厚矣勉於問學思所以成之可

劉舜卿加遙郡團練馬軍都虞候

勅朕臨御華夷不求功伐本欲屈已以安衆故務柔遠而息民蠢彼屬羗夙號逋寇誘陷思立得罪先朝置而不誅冀其改過乃敢結連西夏攻圍南川竊據邊城窺伺便利天奪其魄無復畏忌之心人嫉其奸思致殄滅之勇時予良帥集此膚公具官某學通詩書才任斧鉞靜而知變勇且有謀至則避其銳鋒去則攻其不備臨洮堅壘破不崇朝講珠長橋殘於一炬元惡授首種羗震驚折馘執俘恩旣均於諸將發蹤指示賞不可以逾時宜錫州團之名仍遷軍候之

職河湟遺種未忘反側之心惟惺深謀當審恩威之用勉思全勝以究前功可

游思雄改奉議郎陝西運判賜緋

勅某伐叛柔服朝廷之大義避實擊虛將帥之成筭爾出使西鄙灼知虜情能宣朝論之詳以助元戎之決縛致首惡壞其密謀諸羌震驚邊吏增氣遂以文史之舊與有干戈之功增秩易章未足爲寵奉使將漕益觀厥成予欲戢兵固所望於爾者兵利乘隙豈可以爲常哉可

廖正古通判滄州

勅具官某景城負海帶河爲一都會養兵備邊任素將帥當得才士往爲之佐爾昔爲小官疾奸除惡以能名聞祇服寵命勉思所以爲報可

龐元英鴻臚少卿

勅某朕嘉祖宗將相之臣有德于朝有勞于邊訪其後人長育成就以勸勵百辟矧爾風力强濟出入有聞贊導國容職高而專寡茲朕所以追寵先正之意爾往勉之可

張琬知秀州

勅某有司進退多士必以資考爲之銓次爾入官雖

久而法當為邑擢守嘉禾出於異恩其克臨民以寬勿為苛亟馭吏以嚴勿為姑息思所以答獎用之意可

曾孝序通判莫州

勅某河決而西北方並塞之地頻年水災民艱於食爾以才選往貳守事其思所以均通有無疏導堙塞使吾邊民免於流徙之患則吾爾嘉可

劉言可內殿崇班

勅某爾章獻外家子生於純綺而能勉自飭勵以成淑均之行選與宗姻既緣華族特增美秩茲有舊章

益務自修以永終譽可

張响戶部員外郎改戶部郎中

勅具官某爾既出使近部入贊民曹其為屬任均矣然猶以資考之異別中外之名用人之慎國有常典益勉於事以觀成功可

韓緒等

西賊攻圍鎮戎軍南川寨等處緒等戰守有勞或復傷中韓緒韓進轉二官楊吉池評趙說賊

遜各轉一官

勅韓緒等夏戎背恩侵我疆場犬羊之群遍滿川谷諸將戮力清野以須或斬馘酋豪折其凶氣或堅完壁壘保我丞徒雖矢刃夷傷而忠節彌壯遂使醜類

奪氣引兵遁還得不償費無以復令其下論功行賞
國有舊章疇其勞能增其爵秩朕既無德不報爾尚
勉於立功可

蕃官党令征攬哥趙令京軍恩改官

勅某等朕嗣守丕業凡在臣庶罔有內外咸欲先之
以恩而後責其所報爾等守在藩服世篤忠勤朕不
以遠故遺爾增秩賜邑與朝臣比勉思自効以答恩
寵可

顧臨再授給事中

勅朕歷觀多士惟有實者可以久用而不見其欺若

夫無實之人朝為端良而莫入於邪具官其質重而
文不阿世俗比從將漕擢寘東臺封駁之風震竦朝
聽旋以河漳之害出使趙魏之衝而直聲在人公議
所惜因其入奏俾復舊司勿改平日之心審察未行
之政朕有過舉不憚改為苟無布於四方害及民物
則朕為有知人之哲爾亦有常德之譽矣可無勉哉
可

孔文仲中書舍人

勅政令之出公卿為朕行之而臺諫為朕言之方其
未行內史舍人得聞其議與其既行而後言孰與未

行而議之哉具官某蚤以直言鋪陳治要流落雖久
氣節不衰比自右史遷長諫列朕審聽其言未嘗吐
剛茹柔慨然有仲山之節是以擢實西掖試以代言
夫文墨雍容既爾舊學論思密勿毋替前勞可

張頡待制河北都運

勅河決累年隄防未立西山諸水汗漫無歸屬此秋
霖鞠為汗澤朕北顧之念寤寐不忘雖振廩已行而
宿麥未廣欲使斯民無艱食流亡之患要在使者有
愛人惻怛之誠具官某蚤分刺舉之權旋委方州之
重以勤勞久次之選居出納右部之繁趙魏之憂宜
任其責農桑之政勉盡所宜特加延閣之華以重外
臺之寄可

新字
分類



國家圖書館, NATIONAL CENTRAL LIBRARY, TAIWAN, R.O.C.

字三十八

樂城集卷之三十一

宋 西蜀蘓轍子由 著

明 東吳王執禮子敬 校

西掖告詞五十一首

太皇太后三代

曾祖瓊魏王

勅諭祗事 東朝朝夕咨焉以從政乃者躬見上帝

升帑 神考克以眇躬率行盛禮思所以仰報於

慈訓謂莫如追寵其先人 太皇太后曾祖某蚤事

章聖蔚為名臣智勇冠時忠勤沒世決策澶淵之役

卒致匈奴之和勲列鼎彝慶鍾任姒賦政帷幄澤被海隅家傳異姓之王誓堅帶礪恩加千里之國昭示子孫其尚有知服此休命可

曾祖母李氏燕國

勅朕嗣守 鴻圖初見上帝推衍天澤不冒海涯矧惟 文母之家尊為外戚之冠恩自近始寵無與倫太皇太后曾祖母某氏蘋藻之儀敬而不瀆珩璜之節動必以時作嬪大家肇錫餘慶宜新湯沐之奉以追窳窳之榮音徽永存尚克嘉此可

曾祖母李氏韓國

勅和熹之慶兆自高密外奮武功中篤淳行閭門之風比隆儒者維我 聖母鍾慶烈武積累之厚追配古人宜其室家並受光寵 太皇太后曾祖母某氏夙被女訓有鵲巢之風能使君子成羔羊之行德配圖史福流子孫肆予熙事之成宜錫大邦之寵服我新命貴爾舊阡可

祖繼隆楚王

勅朕惟 祖宗功臣能父子相繼勲業不墜者惟曹氏高氏克顯於世而皆篤生 聖女輔成 二宗之內治今予 神母實親庶政均覆內外是用寵其先

人以慰慈心 太皇太后祖某武力自奮家聲益茂
出擁旄節入董環衛與漢辛氏武賢慶忌唐李氏西
平大涼較長挈大罔有慙德茲予大享于合宮思與
懿戚共享其福大邦名城爾實宜之肇封荆楚以福
爾後可

祖母康氏魯國

勅古之命婦貴從其夫維克有後則以其子矧予天
下之母內極三世之尊可無追崇助我孝治 太皇
太后祖母某氏育德名族作嬪大邦象服之盛配德
於山河彤管之嚴比潔於圭璧比列荆河之壤追賚

可 九泉徒封少昊之墟益彰異數追遠之厚予何吝焉

祖母郭氏豫國

勅朕於舊勲之家無所不厚矧維坤德之重恩何以
加內殫孝敬之深心庶幾慈仁之一喜比緣大賚思
極追榮 太皇太后祖母某氏保傳不勤宗族稱善
姑章安其能養子孫法之不忘茲用推惠澤於總章
易隆名於大國漏泉之慶尚克享之可

祖母全氏秦國

勅朕篤於奉天禮極嚴父思其志意莫如念母之深

寵其祖先尚有追封之典 太皇太后祖母某氏婦
德成於早歲母儀著於當年宜其室家施及宗黨鴈
鳩懷均一之性翬翟見委蛇之容沒而不忘易舊封
於西土傳之罔極告新命於宗祧可

父遵甫唐王

勅高密之仁其報在訓汾陽之功其報在曖維其子
孫不能專有其福寔生聖女以母天下漢唐之盛曠
無與倫 太皇太后父遵甫魏王之孫而楚王之子
也生而富貴動由禮義才甚高而不試德雖隱而自
命之不融中道而殞許我 神母實代天工厚德

載於三朝貴名高於十亂仁民愛物每以生靈而為
心克已復禮深惡外家之太盛臨御期歲遂安四方
和熹才有餘而德不充懿安福至厚而功不著欲報
之德不知所從茲予祀帝於總章大需龐恩於海寓
追崇之典所不敢忘改封堯都增寵家廟可

母曹氏吳國

勅朕以四海之富為 二宮之養猶朝夕歉然以為
未足推予此心以知 聖母追遠之念罔有窮已謂
將成就其美莫如褒顯其先 太皇太后母某氏生
於功臣之家綽有女士之德恭儉廉退孝友慈祥實

生太任作合英祖方其造舟以迎于渭教成而結其
襦母育四方二紀于是君臨百辟期年有成推迹本
源安可忘報改封南國以賁九泉庶乎有知服我新
命可

母李氏秦漢國

勅尊之而欲其貴愛之而欲其富聖人非私其親也
情之所厚禮有必然眷予外戚之小君蚤與唐國之
內治恩寵之異中外莫先 太皇太后母某氏奕世
簪裳生知法度鵲巢無愧於居室麟趾自致於多賢
愛均七子之仁養及中宮之貴迨此臨軒之日方其

授几之辰化被族人貴震海內疏封二國蓋近世之
罕聞壽考百年均本朝之多福可

皇太后三代

曾祖敏中申王

勅昔我 皇祖光宅天下求賢以自輔一時公相皆
世之豪傑子孫顯榮歷世不墜篤生淑女作配皇極
究觀本源蓋非一日之積也 皇太后曾祖某光大
篤實真漢相之風富貴壽考有天人之福畫像原廟
銘功太常方均慶於合宮宜易封於成國服我休命
祚爾後昆可

曾祖母梁氏魏國

勅朕親祀合宮仰以陟配昭考追文王之典俛以大
賚臣工侈上帝之福眷予 母族之重實居戚里之
崇豈無異恩以廣慈念 皇太后曾祖母某氏靜而
守禮存江漢之風動必有儀儼山河之象德洽宗黨
慶流子孫疏封有唐于今歷歲肇新畢萬之國以寵
尚氏之祧可

曾祖母張氏魯國

勅昔尚氏之祖位列丞弼世方平寧在位正直有羔
羊之風退食委蛇本鵲巢之致積是懿德遠其曾孫
嬖子有虞遂母天下寵光所被中外莫加 皇太后
曾祖母某氏躬服孝慈動由禮義其歸以百兩之衆
其貴有六珈之儀壽雖止於中身慶實鍾於來裔推
予享帝之賚錫以保魯之封尚克有知服此休命可
曾祖母宋氏楚國

勅朕躬享昊天升侑 神考外推嚴父之教內懷將
母之誠厚撫其家追王厥祖下迨閨幃之懿咸加封
爵之崇躬孝帥民朕無所愧 皇太后曾祖母某氏
嚴於正家動必由禮采蘋以共公侯之事親桑以致
袞冕之華藹然令猷克光來葉肇新封於荆楚告休

命於丞嘗尚克有知膺此異數可

曾祖母王氏陳國

勅朕尊尊以教敬親親以教愛非予戚里之舊孰能兼受斯禮 皇太后曾祖母某氏毓德柔嘉執禮嚴端服膺保傳之教究知臣妾之勤內無怨言家有餘福致坤元之福遂正母儀之尊方誌祀於總章既大資於寰海易爾句踐之國錫以太昊之墟恩寵有其貴臣無墜可

祖傅亮榮王

勅許爲上公周制也王以異姓漢法也朕兼采周漢之舊以寵親賢之家因大享之告成錫異恩而遠皇太后祖某故相之子生而顯榮躬蹈儒者之風行無世祿之過積累之厚下迨子孫褒寵之優肇建邦邑因其奄受北國之命寵以劔立南面之尊朕將以慰母心爾亦世享廟祀可

祖母吳氏越國

勅申王諸子皆列貴仕榮國不耀中止郎官潛德之深其報在後及孫而顯母儀天下德澤流衍室家光榮 皇太后祖母某氏珪璋之行著於族人蘋藻之恭宜于祖考貴始封邑恩錫有邦茲因總章之祀推

廣隆祐之孝裂會稽之奧壤增湯沐之舊封尚克有知服我休命可

父經周王

勅申伯之德參於周召之間褚公之賢載於王謝之列恩非專於戚里名自顯於搢紳今予外家庶幾前烈皇太后父某絕出世胄交友儒林休聲藹然多福自至卧淮陽之近輔表東海之雄藩清淨不煩得承流之要忠悃深至有入告之常壽止中身慶在隆祐茲因嚴父之祭祀予念母之心大啟周南之封以慰宮中之孝國有常典匪予所私可

母李氏豫國

勅先皇帝刑于室家以御于天下非獨外有輔佐而中宮之懿實與有勞煥乎四德之充豈惟一世之積皇太后母某氏敦闕圖史服勞組紉肅雍娣姒之間祇敬姑章之奉誕生淑女之淵穆不及君子之榮華初建長秋閔追榮之已遠繼開隆祐知餘慶之方遐乃者熙事告成龐恩廣被肇錫荆河之國以新脂澤之田賁于九原嘉此休命可

母張氏冀國

勅朕聞後庭以德進則外戚以福終周之任姒旣克

保其國而漢之薄竇亦能全其家至哉坤元實相內
治宜爾外家之慶仰同帝室之休 皇太后母某氏
性稟淑均德推靖慎因豫國治家之遺迹迨慈徽毓
德於妙年命之不融乃止中壽比緣誌祀啟湯沐於
堯都錫以命書賁烝嘗於家廟漏泉之澤奕世不忘
可

皇伯世儔贈奉國軍節度觀察留後追封奉化
郡公

勅唐之藩郡以留後爲重周之列國以諸公爲貴國
朝兼用古制外以待將帥之功內以優宗室之懿非
此二者未嘗授焉且官某貴而能降富而不盈孝宗
之美著於親黨儼恪之容見於朝會沒身不試遺範
不忘寵加兩使之貳優以五等之貴冕而有知嘉此
休命可

越國賢惠長公主追封大長公主

勅王姬之貴而能執婦道以成肅雍之美朕嘗聞召
南唐棟之詩矣永惟 皇祖之慶篤生淑女之賢賦
命不融中道而沒哀榮之典茲何敢忘故越國賢惠
長公主襲寵宮庭生知禮義儀降王后有車服之崇
德配君子稱室家之懿逮茲享帝之澤推予尊祖之

誠大長之稱寵榮斯極追錫成命以賁九泉可

世繁贈安武軍留後追封信都郡公

勅留後之權均於元帥郡公之爵貴於諸侯國朝兼采周唐之舊官以為親賢之異數慎終追遠斯極哀榮具官某生於富貴之中綽有縉紳之度行已以禮好善不衰朕篤於合族之仁嘉爾終身之善錫之好爵胙以大邦仰增族黨之華俯為窳窳之耀可

唐俛

蓬溪簿於瀘州隨軍部夫入界瘴死贈梓州錄參

勅具官某乃者師征瀘戎爾與在行瘴癘為虐往而不返朝廷追錄勤勞不遺細大特遣官那之贈以易

賻布之禮孝子之請予何忍違可

克賢贈奉國軍兩使留後封奉化郡公

勅生於富貴而成於禮義克自抑畏以沒其身不有寵榮何以為勸具官某宗黨稱孝朝廷所賢肅雍右衛之華捍禦遙州之重賦命不淑中道云亡匍匐之恩情何極已哀榮之典國有故常可

士觀贈左領軍衛將軍

勅具官某宗室之良生而不試沒而無述則為善者何勸焉以孝弟忠信紀於族黨贈之諸衛之秩以表平生之賢鬼而有知嘉此休命可

安燾三代妻

曾祖

勅朕方恭默思道垂拱責成乃者大享合宮陟配
聖考躬執珪幣敬逆神休奉璋戔戔皆先朝之舊降
福簡簡告純嘏之豐朕弗敢專用廣其施具官某曾
祖某懷抱美志浮沉人間孝弟篤於父兄忠信驗於
朋友天道不諂報在子孫人爵自高寵極師保朕命
不替世世賴之可

曾祖母

勅朕嚴父配天以教天下之孝肆膏及物以廣上帝
之仁顧予左右丞弼之良咸有肅雝顯相之助既
榮其祖禰復追賚其室家具官某曾祖母某氏蘋蘩
之儀敬而不瀆珩璜之節動必以時休聲藹然後世
追誦宜錫召公之社以寵安氏之祧尚克有知服我
休命可

祖

勅天之於人無德不報凡今卿士大夫有立於朝尊
寵於世者皆其先人積累之厚茲朕既奉 神考以
配上帝尊親之極誠禮兼盡思與羣公推廣斯義以
致其孝具官某祖某才甚長而不試德久晦而自彰

身雖屈於當年善終表於來世三師極品焜耀縉紳之間九原有知寵綬存歿之地可

祖母李氏

勅古之命婦貴從其夫惟克有後乃以其子矧予本兵之地實總幾事之煩乃者大享合宮相予肆祀義無不答禮有追崇具官某祖母李氏性本柔嘉行稱純潔婦德成於雍穆母儀備於慈仁胙以少昊之墟易其叔鐸之土服我休命宜爾後人可

祖母齊氏

勅古之命婦貴從其夫惟克有後乃以其子矧予本兵之地實總幾事之煩乃者大享合宮相予肆祀義無不答禮有追崇具官某祖母齊氏恭順以惠女師慈儉以奉君子閨門從而有禮子孫賴以多賢上蔡之封歷年於是大名之壤開國惟新寵以密章貴爾家廟可

父

勅士之脩身行義不顯於國必顯於鄉黨故其乘時得志不在其身必在其子孫謂天難忱於事可考具官某父某樂於潛晦不求聞知推良心以與人抱長才而不試安輿就養遍歷於方州西府宴閑薦移於

歲月錫之好爵以裕予心服我寵章益介眉壽可

母張氏

勅士大夫義隆於顯親恩深於念母追劬勞之罔極
悼寵祿之無施茲予誌祀於總章大需龐恩於海縣
思廣吾孝以卽爾心具官某母張氏靖而有禮勤於
治家空傳四德之名不待千鍾之養寵加異數以慰
終天爵無異於生榮地莫加於韓樂服我休命子孫
不忘可

母王氏

勅朕惟左右之臣家有父母之養自公退食朝夕侍
側以盡人子之願者方今一人而已總章之慶恩被
遐遠封爵之厚予何愛焉具官某母王氏居不忘敬
行必由禮手治蘋藻躬執組紉老而不衰足以爲法
宜錫三秦之壤以爲一族之華壽考且寧祗服朕命
可

妻

勅朕初見上帝嚴配文考公卿駁奔來相熙事工祝
致告均錫純休朕不敢專思以迨下非獨身享其報
亦使家被其榮具官某妻某氏少長名家輔佐吉士
丞嘗之敬先祖是安膳服之宜宗族咸喜仁厚見於

麟趾正直發於羔羊宜增湯沐之封益耀并珣之寵
服我新命宜爾家人可

李清臣三代妻

曾祖

勅朕方恭默思道垂拱責成乃者大享合宮陟配
聖考躬執珪幣敬逆神休奉璋峩峩皆先朝之舊降
福簡簡告純嘏之豐朕弗敢專用廣其施具官某曾
祖某迹晦鄉黨德如珪璋力行於方寸之間責報於
百年之後子孫之盛縉紳罕聞保傳之尊德義爲允
取我休命宜爾後昆可

曾祖母尹氏

勅朕嚴父配天以教天下之孝肆菁及物以廣上帝
之仁顧予左右丞弼之良咸有肅雝顯相之助旣寵
榮其祖禰復遺賚其室家具官某曾祖母某氏及其
良人咸有淳行孝敬稱於宗族福祿迨其子孫築名
備科與我近輔肇啟伯禽之邑以爲家廟之華其尚
有知朕意無斁可

曾祖母周氏

勅朕嚴父配天以教天下之孝肆菁及物以廣上帝
之仁顧予左右丞弼之良咸有肅雝顯相之助旣寵

榮其祖禰復追賚其室家具官某曾祖母周氏珪璋
之行著于族人蘋藻之恭竭于嘗禘貴始封邑恩錫
有邦肇從申伯之封改食潞子之國服我休命以賁
宗祧可

祖父

勅天之於人無德不報凡今卿士大夫有立於朝尊
寵於世者皆其先人積累之厚茲朕既奉 神考以
配上帝尊親之極誠禮兼盡思與羣公推廣斯義以
致其孝具官某祖某修身正家而聲被於鄉黨居約
履順而福流於子孫世有英才與聞大政寵列三師
之貴祚隆十世之餘錫之閔章以賁幽隧可

祖母

勅古之命婦貴從其夫惟克有後乃以其子矧余中
臺之轄實總萬機之煩乃者大享合宮相予肆祀義
無不答禮有追崇具官某祖母某氏服勞組紉敦閱
圖史祗敬姑章之奉肅雍娣姒之歡中饋之儀風猷
未替東國之贈寵數有加賜之密章賁爾廟祐可

父

勅士之脩身行義不顯於國必顯於鄉黨故其乘時
得志不在其身必在其子孫謂天難忱於事可攷具

嘗某父某隱而不試久乃自彰孝弟隆於父兄忠信
驗於朋友是亦爲政人無間言由其教子之嚴爲我
得臣之助比推恩於秋享增峻秩於師垣追賁九原
尚克嘉此可

母

勅士大夫義隆於顯親恩深於念母追劬勞之罔極
悼寵祿之無施茲予誌祀於總章大需龐恩於海縣
思廣吾孝以慰爾心具官某母某氏山河之容江漢
其行夙被女訓有鵲巢之風能使君子成羔羊之德
宜卽鄉邦之貞壤以爲封國之美名服我寵章祚爾

後嗣可

妻

勅朕登用雋傑委任責成非獨厚以爵秩之華亦將
盡其室家之願乃者躬祀帝考大賚臣工封國迨於
閨闈世祿通於子弟朕於卿士實無愛焉具官某妻
某氏生於名儒之家綽有女士之德愛均諸子比鴉
鳩之仁貴以良人備翬翟之服肇錫山河之廣寵增
湯沐之封宜其家人服我休命可

范純仁三代

曾祖

勅朕方恭默思道垂拱責成乃者大享合宮陟配
聖考躬執珪幣敬逆神休奉璋峩峩皆先朝之舊降
福簡簡告純嘏之豐朕弗敢專用廣其施具官某曾
祖某潛德不耀餘慶自彰仁義之報不及其身功名
之實灼見於後極三師之貴既錫於寵名慰九原之
知肇建於成國可

曾祖母

勅朕嚴父配天以教天下之孝肆青及物以廣上帝
之仁顧予左右丞弼之良咸有肅雝顯相之助既寵
榮其祖禰復追賚其室家具官某曾祖母某氏幽閑
之中率禮不越共儉之素御家有常報在子孫世篤
功烈肇錫韓侯之邑以爲家廟之華其尚有加服寵
無數可

祖

勅天之於人無德不報凡今卿士大夫有立於朝尊
寵於世者皆其先人積累之厚茲朕既奉 神考以
配上帝尊親之極誠禮兼盡思與羣公推廣斯義以
致其孝具官某祖某種德之深稼而不穡發源之遠
流則愈長偉哉元子之賢繼以諸孫之盛廟食之久
益未可量鄉國之封肇新其舊可

祖母

勅古之命婦貴從其夫惟克有後乃以其子矧予本
兵之要實總幾事之煩乃者大享合宮相予肆祀義
無不答禮有追崇具官某祖母某氏徽柔靖恭信順
慈孝天道不諂報在後昆人爵自高祚以封國易宛
丘之故地錫全楚之大邦尚克有知服我新命可

祖母

勅古之命婦貴從其夫惟克有後乃以其子矧余本
兵之要實總幾事之煩乃者大享合宮相予肆祀義
無不答禮有追崇具官某祖母某氏服勞組紉敬治

蘋藻祇率祖考之舊循致子孫之賢中饋之儀風猷
未替西國之贈寵數有加賜之密章以嚴廟祀可

父

勅昔我 皇祖仁宗博求多士以綏靖四方天惟眷
祐賚之正人旣以克和羗戎又以爨治區夏出入中
外實兼文武之烈今予嗣守丕業選任大吏亦拔西
帥以臨中樞匪伊異人惟父惟子得人之盛朕無愧
焉具官某父某秉德不貳好謀而成始任諫諍知無
不言中爲將帥靖而能勇卒以功業股肱先聖茲予
懷想風烈用建爾仲子嘉其緇衣之德錫以召祖之

命惟師保之貴既無以加故河漳之封益大其寵可

母

勅士大夫義隆於顯親恩深於念母追劬勞之罔極
悼寵祿之無施茲予愍祀於總章大需龐恩於海縣
思廣吾孝以慰爾心具官某母某氏山河之容江漢
其行其君子正直有羔羊之德其後世信厚有麟趾
之風宜錫寵榮以慰存沒乃祖唐相實啟衛國之封
眷予樞臣願爲密章之贈賁于幽壤尚克嘉之可

中丞劉摯父

勅朕臨照百官寄耳目於中執法乃者季秋大享駿

才在廷迄于熙事之成繫其正色之助方均行於惠
澤宜特先於庶工具官某父某種德之深終身不顯
教忠之篤沒世乃彰挺然司直之良美哉有子之慶
不有錫命孰知其賢宜加四品之崇以爲九原之慰
可

續城集

卷三十一

百

夢軒



國家圖書館, NATIONAL CENTRAL LIBRARY, TAIWAN, R.O.C.

樂城集卷之三十二

宋

西蜀蘓

轍子由

著

明

東吳王執禮子敬

校

西掖告詞四十九首

苗貴妃三代

曾祖

勅昔我 仁祖刑于室家以御于邦國下迨嬪御化
其德風周不賢淑迄茲三世猶有耆舊儀于六宮故
其祖考日益尊顯 貴妃苗氏曾祖祚潛德不耀久
而後彰至于曾孫寵託宮掖茲因大享祇率舊章命

爲上公封以成國九原有知尚克嘉此可

曾祖母

勅天之報施昭然不誣世之顯榮皆有由始而況迨事皇祖流澤私親夫豈偶然而至於是貴妃苗氏曾祖母馮氏柔嘉之德見紀於族人慈儉之風有聞於後世乃眷曾孫之貴親承大享之休易湯沐之舊封爲窀穸之新寵服我成命世世不忘可

祖

勅朕嗣守鴻圖初見上帝推衍天澤不冒海隅矧惟先朝舊人外家通貴恩自近始宜無與先貴妃

苗氏祖仁恭隱約之中操修以禮被寵光於來裔報施之不誣官爲上公已極人臣之貴地分全楚復推列國之雄錫是閔章以賁幽壤可

祖母

勅朝廷寵綏臣庶褒顯其先惟有四輔之崇乃錫三世之命其於禁掖殆無幾人貴妃苗氏祖母袁氏容德之修著於宗黨福祿之盛及其子孫方予熙事之終胙以成國之賦賁爾廟祀世世保之可

父

勅於赫皇祖仁覆四方永懷弓劍之遙不忘簪履

之舊而況逮事左右今爲老成宜其尊親特被休寵
貴妃苗氏父某躬有懿行篤生淑人旣壽且康允
仁而信薦經元祀之慶每極追崇之榮肇錫大名以
配隆爵密章之賜澤及九泉可

母

勅故舊不遺則民不偷矧吾三朝之人獨享百年之
福眷爾近戚予何可忘 貴妃苗氏母裴氏徽柔靖
恭幽閑肅敬行應家人之美慶鍾女子之祥茲予大
享之成肇易新封之寵漏泉之澤存沒兼榮可

文臣升朝封父母妻

父

勅具官某父某朕茲祀總章陟配 神考子大夫葬
委厥服咸與有勞推予嚴父之心爲爾顯親之慶錫
命之寵壽考不忘可

母

勅具官某母某氏慈惠有以宜家肅敬可以教子乃
者大享之禮百執咸事朕寵綏忠孝之心推本源流
之自疏爾爵邑以榮子孫可

妻

勅具官某妻某氏士大夫出仕于朝能以恭儉正直

成羔羊之美必有淑女以治其私用能退食委蛇無
內顧之慮朕方推帝澤於天下其何愛一邑不以寵
其家人可

文臣升朝追封父母妻

父

勅朕具官某父某合官之享義存嚴父朕惟天下之
士追養之誠上下無間是用推予錫命之寵旌爾教
忠之勤九原有知尚服休命可

母

勅具官某母某氏生能正家沒有良子欲盡劬勞之

報其如爵命之隆方大賚於總章宜肇新其湯沐

我休命世世不忘可

妻

勅具官某妻某氏恭事君子宜其家人勤勞則同而
寵榮莫及存沒之念終身惻焉方予慶賜之行肇加
脂澤之奉賁于窀穸尚克嘉之可

范鎮父

勅士有歷事三世秉持一心志懷金石之堅言爲社
稷之計耄期不亂清靜無求訪之古人殆亦無幾朕
旣復命以位思見其人旋觀德業之崇知有源流之

自其官某父某隱居間巷名出搢紳以孝弟爲傳家之資以詩書爲教子之實自修於方寸之內責報於百年之間子孫勃興冠冕相繼方予大享之慶錫以追崇之榮開府之儀比隆於三事漏泉之澤少慰於終天可

鮮于旉父母

父

勅朕旣得直諫多聞之士而寘之禮樂之司擢之諫諍之列矣乃者總章大享來相于庭因予嚴父之心成爾顯親之願具官某父某懷抱美志博通古文上自河圖洛書下及天文地理無有不綜庶幾古人先懷而歸以遺後嗣金章紫綬雖不及其平生密印閔書示追榮於泉壤可

母

勅婦人之賢室家所賴上能使其君子有羔羊正直之行下能使其後世有麟趾信厚之風詩人所嘉於今猶信朕旣得其子以知其親具官某母趙氏江漢之行山河其容手執詩書親教子弟雖負米而養自有孝弟之歡而列鼎以祠莫盡劬勞之報宜易脂田之券仍加偷翟之榮追賁九原以慰存沒可

陳曼父閏

曼任登州錄事父閏年九十一以敕封承務郎

勅具官某父某總章之慶凡通籍之士皆獲爵命其親朕惟子大夫沉於下僚家有耄期之養而寵榮不及念之惻焉錫爾一命以綏子孫之志可

錢勰父母

父

勅錢氏舉國內附俾吳越之人免兵革之亂子孫受封帶河礪山藏在盟府矧其後世賢傑間出赫奕相望其於追崇安可復後具官某父某貫穿墳史練達典章博辯有文絕出倫輩父子兄弟進以直言譽喧

一時望以卿相中道而隕報在後昆儼然侍從之華與我總章之祀寵之開府載是閔書九原有知服命無教可

母

勅婦人之貴當從其夫禮變古今義均存沒肆予大享之慶俾極追封之榮具官某母某氏育德高門作嬪大族生知圖史之樂不煩保傳之箴餘慶在其子孫清風播於宗黨肇封成國光有翟衣錫此密章寵爾廟祔可

李瑋三代

曾祖

勅昔我 仁祖敦睦九族以和萬邦顧惟念母之深
特厚外家之禮往事雖遠此恩未移具官李瑋曾祖
某懷抱美志浮沉人間孝弟篤於父兄忠信驗於朋
友天道不諂報在子孫人爵自高寵極師保肆予大
享之慶肇易三秦之封九泉有知服我休命可

祖

勅成王之母邑姜齊侯世受其祉宣王之母申后申
伯亦賴其寵矧我 皇祖之聖重以李氏之賢子孫
相承冠冕日盛追崇之典國有舊章具官李瑋祖某
隱約之中操修以禮克有淑女篤生聖人寵雖不遠
於平生澤尚可加於來裔比因秋享肇易國封錫是
閱書以寵廟祀可

父

勅朕深惟 仁祖之意寵綏元舅之家申錫婚姻以
固恩禮乃眷奠邦之嗣來相合宮之祠熙事告成鴻
恩先及具官李瑋父某貴而能降富而不驕諸子之
賢迭爲將帥大邦之寵更王齊秦肇新錫命之書以
慰終天之感可

王堅父

勅朕惟景德祥符之間治定功成庶幾三代時維丞相魏公左右厥辟同底于道於穆清廟卒配烝享至於慶曆嘉祐之際克有賢子不墜厥家出入中外允文允武茲予季秋大享追念先正之後有能在朝相我熙事宜有褒寵以勸百官具官某父某始以諫諍名聞朝廷終以將帥威加戎狄父錫之慶子成厥功故雖富貴顯融赫奕再世而天下之議不以爲過生爲六官之長沒加三事之榮匪予爾私惟德之報可

曾布父

勅曾氏系出東魯淵源師友本於孔氏譜牒詳具雖遠而明子孫盛大繼顯於世具官某父某文學之美肖其先人議論之長信於來世仕而不遇志存於書沒而愈彰慶鍾厥子屬詞比事粲然有古人之風理財禦邊卓然有當世之具才智競爽爵秩同升其於搢紳殆無一二朕旣任以事恩寵其先今茲大享告成顯親沛澤追錫崇階之贈以慰九原之知可

蔡確父母

父

勅位極三師而爵封大國雖元勳盛德有不能至者矣而將相大臣欲顯其親者得之吾是以知積善之

爲難而有子之爲貴也具官某父某潛於下僚不求聞達躬有懿行久乃發揚美哉中子之賢任予元宰之事久厭機務退守便蕃深念教忠之勞求易苴茅之賜大名與壤雖爲甸服之雄全楚新邦願卽故鄉之近九原未泯尚克嘉之可

母

勅貴以其子而爵從其夫此婦人之禮也時予舊相之寵告我念母之誠亦何愛於大邦不以成其純孝具官某母某氏仁以逮下嚴於治家禮先中饋之勤恩遍外姻之廣命之不淑沒有餘哀肇具脂田之封永保荆人之國寵爾廟室以利後人可

秦晉國安仁保祐夫人張氏祖祖母父母

祖

勅具官某祖某朕追懷弓劍之遙不遺簪履之舊矧功存於保護而寵極於平生宜因大享之恩成其尊祖之念寵加列衛追賁九泉可

祖母

勅具官某祖母某氏朕祇祀合宮嚴配 聖考思其志意恍焉如存是以推廣舊恩施及幽遠肇易脂田之奉以申追遠之誠可

父

勅具官某父某朕孝愛之深無德不報永惟保育之舊夙著劬勞之恩方大享之告成宜顯親之施及諸衛之貴存沒兼榮可

母

勅具官某母某氏爾蚤以息女之良功存蕃邸之養報已隆於貴顯恩宜逮於存亡肇新湯沐之封以爲幽冥之慰可

世采母李氏安康郡太君世智母何氏永昌郡太君

勅嚴父配天國之大禮也以子貴母三代之舊章也茲予大賚之慶澤被含生之倫矧於近親志切追遠錫命之典其何可忘具官某母某氏承上克恭臨下以禮生著御家之法歿聞有子之賢賜湯沐於大邦爲窳窳之餘寵九原未泯尚克嘉之可

張方平父

勅士之懷抱志節老於山林不求聞知者何可勝數永惟公卿之貴本由父祖之賢行義絕倫聲聞不著特緣有子得列於朝追想風猷不忘嘉歎具官某父某性本靜重行極高明宴坐一室之間心遊萬物之

表澹然自守寡笑與言遂以絕人之姿深積傳家之慶柱石之寄嘗參二府之崇几杖之儀又已十年之久比緣昭配許以侍祠宜因均福之恩懋錫追崇之典地分全魏爵列上公九原有知服我休命可

李端愿父母

父

勅富而好禮貴而不驕勢憑戚里之榮躬被儒者之節昔聞其語未見其人具官某父某爵本傳家親聯築館進退以禮無世祿之非交友多賢盡當時之傑被遺前聖流芳後來有子而賢久列東宮之貴開府

以贈仍因西土之封錫是閔章賁爾幽隧可

母

勅帝乙歸妹而交泰之功著王姬之車而肅雝之禮成風化所由恩禮當異具官某母某氏淵源之盛當世莫倫禮義之隆至今傳誦儼若姑章之奉穆然閨壺之風車服下於王后而不以驕人子孫衆如螽斯而要於守法故能奕世不墜休聲愈隆茲予大享之成因爾故封之廣閔書密印寵數不渝可

張方平祖

勅朝廷優二府之臣列三世之贈眷我耆舊退處鄉

間方大享之告成宜申錫於休命賁及祖廟進封大邦具官某祖某修身正家而聲被於宗黨居約履順而福流於子孫力行於方寸之間得報於百年之後朝之大老惟爾元孫肇新淇奧之封增寵師臣之貌告于幽隧服此優恩可

富紹庭母

勅朕追懷先正之臣建功當年流澤後世時惟丞相臨淄公以甘盤之舊股肱太平丞相韓公以魏丙之賢翼亮數世風流未遠家事落然比因大享之成重與追遠之念具官某母某氏臨淄公之子而韓公之配也幼服圖史之訓晚同忠義之勤有德有年五福兼備奄從淪謝中外咨嗟茲用不忘舊勲寵加新命因其封國之故以明有子之良賁爾宗祧世世無斁可

蔡朦父挺贈開府儀同三司

勅昔我皇考分命守將鎮撫四夷時惟西羗弗克靖順實賴良帥是震是服遂以顯績進登西樞命之不融中道而殞聲蹟之美于今不忘具官某父某謀猷靖深勲業崇茂治邊之略紀于一時經遠之功著于來世比緣陟配之享永懷先正之良追錫崇階比

儀三事有子之慶奕世嘉之可

劉放母

勅婦人之賢著於麟趾贈禮之盛極於暈衣朕親享合宮加惠百辟矧復從官之列來告念母之誠可無異恩以示追遠具官某母某氏篤生大族作配名儒環佩之聲動必由禮蘋藻之薦舉不失時追懷令猷尚有諸子守道不倚則漢中壘尉博學不倦則唐居巢侯美哉有子之良爲我得臣之助祚之大勗慰爾九原可

奉議郎任斯年祖母黃氏

以母封回授永壽君

勅朕親享合宮均慶多士以寵榮其親推而上之又及其祖其於親親尊祖之義備矣美名大邑介爾眉壽子孫不忘益勉忠孝可

張琬父昇追封韓公

勅朕追懷 祖宗下逮先正聞嘉祐治平之盛宗臣大老相望於朝永思其人如見風采具官某父某始以直氣振於中司終以令德長於西府歷事 二祖懇款一節歸老嵩少追迹松喬殂謝未幾風烈猶在比緣合宮之祀嘉其有子之慶卽封鄉國以賁私祧九原有知服此休命可

安燾知樞密院贈三代

曾祖

勅樞臣之長戎政出焉內則張皇六師以禦外侮外則綏懷四夷以安中國久虛之位歷試以庸特推三世之恩以示百官之勸具官安燾曾祖某處躬甚厚與世無求人莫能知而天相其善身隱不仕而世承其休逮爾曾孫之良冠予西府之列折衝之效偃革可期斯用錫帝傳之隆名賁私祧之常祀九原来泯百世不忘可

祖

勅古之賢君有師臣之義朕臨御百辟想見其人眷予宥密之賢夙承祖考之烈積德之厚獲報甚隆寵之上公以見予意具官某祖某賦性端慤終身退藏孝弟發於自然忠信驗於來世松生於谷閱歲不衰泉發於山造平而大啟良心於嗣子胙多福於元孫歸乎家廟之隆數致閔書之賜賁于幽隧宜爾後昆可

父

勅子之能仕父教之忠率循孝弟之風施及邦家之廣朕既用其子不忘其親薦錫崇階之榮以寵退食

之養具官某父某資性淳篤既慎靖以安貧操行堅強亦共儉以居富一變簪裳之盛親見廊廟之崇循致承平既股肱之允賴報之寵祿宜命數之超升壽考且寧訓敕無怠可

王汝舟祖母胡氏封嘉興縣太君

汝舟乞以妻叙封回受

勅某合官之慶士得以其親及其室家之封封其大父母今汝舟願以妻之叙而加其祖母恩從其厚將以極尊祖貴老之義而已綏爾眉壽服寵無斁可

皇兄令擢等所生母贈太君

勅某母某氏合官之慶澤被存汝舟為生令人當以

子貴肇錫湯沐之奉以慰怵惕之感竟而有知嘉此休命可

富弼贈太師

勅慶曆之盛朝多偉人維范與富才業名位實相先後海內稱誦見於聲詩比之夔契經涉險阻繼以存亡惟天所佑克享全福歷相三世配食清廟肆予大享加寵先正亦克有子列于在廷具官某父某德及夷夏功載史冊出盟獯鬻復結二國之歡入秉陶鈞首開萬世之議性本直諒終身不回心樂虛閒超世自得音容未遠風烈可追錫以上公之章明我師臣

之意告于幽隧慰爾後昆可

劉沆追封秦國公

勅生而秉鈞顯名於世沒而有於通籍子朝家存舊德之餘國有世臣之盛比緣大享之慶來告顯親之誠勲舊旣隆恩寵亦異具官某父某奮身南國致位中台風蹟之優効見於民政勤勞之久聲載於圖書頃自告終奄更三世爵極師保之重國分吳會之雄宜錫社於秦亭示追崇於家廟九原未泯服此鴻恩可

盧政贈司空

勅 祖宗懷柔四方兵革不試雖有貔虎之士擁旌鉞之寄皆老死侍衛之間不見才武之効然其聲績未泯子孫在廷追遠之恩國有常典具官某父某弓劔之任推雄萬夫韜略之賢著稱當世卒能保寵以沒其身茲大享於合宮示追崇於列辟宜錫冬官之印以增家廟之榮覓而有知服寵無斁可

王存妻胡氏齊安郡夫人

勅朕敷求哲人咨以大政知其有孝恭祖考之義則爵其三世以禮其私祧知其有慈愛室家之心則封之大郡以助其內治凡所以深慰其情而優爲之禮

者亦已至矣具官某妻某氏舉無失中言必由禮起於糟糠而善處窮約逮其富貴而不聞驕奢茲使君子綽有成德遂登丞轄之位率由夙夜之佐是用望郡以爲湯沐翟弗以與會朝勉修令猷答此休命可

楊王第三女封安定郡主

勅朕有懷 二宗思見文武之盛念我叔父亦配間平之賢粵維禮命之優蓋有朝廷之舊女旣及笄而字爵當裂土而封恩禮之隆孝敬斯在楊王第三女幼而好禮姆教不煩長而知方婦德已備茲擇良士亦惟外親將修纁鴈之儀肇錫湯沐之奉惟恭且儉可以保是美名惟孝與和可以安於二姓風化之首其尚勉之可

身坊集

卷三十一

七

四十三德

成集卷之三十一

清夢軒



國家圖書館, NATIONAL CENTRAL LIBRARY, TAIWAN, R.O.C.

樂城集卷之三十三

宋 西蜀蘓轍子由 著

明 東吳王執禮子敬 校

北門書詔五十四首

麻制十三首

除苗授保康軍節度知潞州制

門下上將之任本智略以爲先萬夫所望亦材武之
氣尚惟擢拜之未幾亟辭疾以告勞言念悃誠式敷
以命殿前副都指揮使武泰軍節度黔州管内觀察
使直等使持節黔州諸軍事黔州刺史上柱國濟南

魏開國公食邑二千八百戶食實封三百戶苗授蚤
讀兵法有志事功久踐戎行自奮邊鄙入參環列既
被遇於先朝累積歲勞適謀選於元帥遂分旄節
之寄克諧卒乘之懽宿衛逾年勤勤爲請愍獨賢於
煩使俾覲佚於近藩爵加貴名邑衍真食潞子之舊
俗武而淳守土之臣事簡且暇於戲建燾而出知寵
數之不移勿藥有瘳幸年歲之未暮卧理非壯士之
節力疾有忠臣之風勉疾安平起就勲業可特授檢
校司空持節房州諸軍事房州刺史充保康軍節度
房州管内觀察處置等使知潞州軍州事兼管内勸
農使兼提舉澤晉絳慈遼州威勝軍屯駐泊就糧
本城兵馬巡檢公事替韓宗古加食邑五百戶食實
封二百戶勲封如故主者施行

除劉昌祚武康軍節度殿前副都指揮使制
門下多畜衛兵莫如國朝之盛次補元帥蓋本
祖宗之常顧惟萬騎之選師重以千廬之嚴微欲衆
心之素服非宿將而莫當誕告在廷咸聽朕命侍衛
親軍步軍副都指揮使冀州管内觀察使持節冀州
諸軍事冀州刺史上柱國彭城魏開國侯食邑一千
九百戶食實封一百戶劉昌祚奮由弓劒資以韜鈴

整於治軍才出邊將之右勇於對敵聲著隴山之西
乃者取其先朝指蹤之餘授以平涼總護之貴種
羗久困旣款塞以來庭環尹適虛歸釋甲而御衆爰
加旄節之重以壯轅門之觀旌旆不移什伍如故當
使少加號令自益精明於戲仁足附衆則六師不擾
威能克愛則萬夫可齊亦俾貔貅之徒咸知忠孝之
節勉矣來效徃其欽哉可特授持節洋州諸軍事洋
州刺史充殿前副都指揮使武康軍節度洋州管內
觀察處置等使勳封食實封如故主者施行

明堂呂大防加恩制

門下昔吾祖宗革五季之遺復三王之舊皇祐之
盛始寓總章於外朝元豐之隆載嚴上帝之定位物
有成憲敷遺後人朕因而循之罔有失墜乃辛巳之
吉躬被冕服祗卽羣工禮成不遺神貺昭答誕降多
福均畀在廷太中大夫守尚書左僕射兼門下侍郎
上柱國汲郡開國公食邑二千九百戶食實封六百
戶呂大防篤實而文寬厚而粟在英祖時納忠不
回爲名御史在神考時宣力不懈爲賢守臣逮茲
績承卽與丞弼旣全付之鈞軸遂能任我棟梁正顏
色而誠意宣出詞氣而忠邪辨左右三載咸乂四方

民無煩苛羗率舊職稼穡茂遂神人燕安俾我釐事告成舊章不墜雖荷帝祉時惟乃功宜因賜胙之恩遂行進律之典增大國邑衍食真封疇爾茂勲勸我多士於戲公爾忘私非獨得君亦以獲祐於帝寬而有制非獨善始亦以克要厥終及茲休成同底至道可特授依前官職加食邑一千戶食實封四百戶勲封如故主者施行

皇伯祖宗暉加恩制

門下宗祀配天所以教諸侯之孝加地進律所以廣上帝之恩矧維天屬之尊世奉 漢園之享相予

肆祀綏我思成躬率父兄之和以致天人之應用敷大號昭告治朝皇伯祖鎮南軍節度洪州管內觀察處置等使檢校司徒開府儀同三司持節都督洪州諸軍事洪州刺史上柱國嗣濮王食邑一萬二千一百戶食實封三千七百戶宗暉爵封世王名冠屬籍貴而能降富而不驕孝弟肅恭率本天姿之懿威儀問學蚤承師訓之良同我絜齋獻於饋熟進退和於禮節升降比於樂章逮此休成宜均多福益衍舊封之廣仍加真食之優於戲承安懿之後思繼前人之令猷兼將相之隆勉圖夾輔之休烈茲因受爵之寵

益起循牆之恭庶無間然克有終譽可特授依前官職加食邑一千戶食實封三百戶勲如故主者施行

皇叔祖宗祐加恩制

門下朕出款原廟之嚴入謁總章之秘師臣外帥多士以靖吾國宗卿內帥諸父以正吾家親賢旣和天人咸若膺受多福施及四方矧惟族屬之尊宜有寵光之異皇叔祖寧遠軍節度容州管內觀察處置等使持節容州諸軍事容州刺史上柱國鞏國公食邑五千八百戶食實封一千六百戶宗祐耻爲富貴之習動由禮義之中祇順父兄親近師友肅若閨門之

治穆然朝謁之容秉旄鉞而四方之志行錫茅土而諸侯之禮備遠鎮容管近殿洛師處之若無久而益慎爰推大賚之澤益彰有德之榮增衍故封懋錫真食於戲考之晉人則安平之於武帝求之唐室則元嘉之於高宗皆以德重屬高恩隆禮異往祇服於明命思無愧於古人可特授依前官職加食邑七百戶食實封二百戶勲如故主者施行

皇叔祖宗楚加恩制

門下漢封同姓之國勢遂疏於本朝唐任宗室之隆用每雜於他族祖宗酌古今之典篤兄弟之親雖

極茅土之封常居朝謁之地眷禮特異前世莫倫皇叔祖建武軍節度邕州管内觀察處置等使持節邕州諸軍事邕州刺史上柱國鄖國公食邑五千八百戶食實封一千六百戶宗楚孝友根心文藝餘性居處恭故不聞過行室家理故可以涖官師保不煩朋友稱信乃者顯相原廟之祀齋宿總章之廷醴假無言質明成禮顧惟大賚之澤宜處羣臣之先益衍故封陪敦真食於戲宗祀之典所以教孝於諸侯賜胙之恩所以均福於上帝誠觀禮以知義尚修身而保終祗服寵光永有燕譽可特授依前官職加食邑七

百戶食實封二百戶勲如故主者施行

皇弟徽宗御名加恩制

門下朕惟成王尚幼而紹文武任姒之業時其諸弟之貴則有邦晉應韓之封皆克保邦以輔王室今予仲叔之衆咸訓祖考之謀方宗祀于文人以陟配于上帝禮成弗越孝思無窮爰因降福之多以均同氣之盛皇弟鎮寧軍節度澶州管内觀察處置等使檢校太尉開府儀同三司持節澶州諸軍事澶州刺史上柱國遂寧郡王食邑六千戶食實封一千九百戶佶得天之粹克孝于家典學之初弗煩于傳觀其

率禮之意既有成人之風受冊苴茅已賜盟於如礪
備儀出閣終有賴於維城朕方推神之休布澤于下
豈茲貴介而有忽遺宜增多戶之封并衍真食之賜
於戲富而知稼穡之事則富可保貴而知君臣之節
則貴可全受爵既先於四方修已豈後於羣辟祗服
明訓其永有詞可特授依前官職加食邑一千戶食
實封三百戶勲如故主者施行

皇弟似加恩制

門下朕明發而興有懷文武之烈孝愛之廣施及兄
弟之親茲擇季秋之良躬展總章之祀并侑烈考昭
配昊天執幣以前愾然如在念遣意之所屬顧同氣
之當先皇弟集慶軍節度亳州管內觀察處置河堤
等使檢校太尉開府儀同三司持節亳州諸軍事毫
州刺史上柱國普寧魏王食邑五千戶食實封一千
七百戶似幼有岐嶷之姿長見肅雝之美克勤朝夕
既已無違於家日親詩書知其有志于學爵分茅土
之責任兼將相之榮身能處之不驕人亦期之可久
宜益舊封之廣仍加真食之多於戲顯宗之於東平
下腰腹之詔明皇之於隆慶歎羽翼之詩朕既無間
於伯仲之間爾亦無忘于孝友之行外以事國內以

顯親可特授依前官職加食邑一千戶食實封三百戶勲如故主者施行

皇弟偲加恩制

門下古者教成於家治定於國九族既睦萬邦咸和今予季弟之親未遑就傳之禮追先帝眷懷之深意推東朝鞠育之異恩錫命之隆可後於衆皇弟武成軍節度滑州管内觀察處置河堤等使檢校太尉持節滑州諸軍事滑州刺史上柱國祁國公食邑三千七百戶食實封一千二百戶偲生而敦大長則惠和氣稟清明有室家君王之喜心懷徇達知師保

教訓之方乃者擇季秋之良修宗祀之禮事天所以報本嚴父所以顯親罄海宇之人孰非付託之重念天倫之戚永懷顧屬之隆宜因慶賜之行并衍封食之賜於戲父兄皆萬乘之富豈其患貧爵秩既五等之尊貴於能降罔恃得之之易當念守之之艱滿而懼傾高則不墜可特授依前官職加食邑七百戶食實封二百戶勲如故主者施行

馮京加恩制

門下世臣之於故國增望實之隆老成之於典刑有諮謀之益眷吾嘉祐侍從之列實惟朝廷心膂之臣

迨今所存數人而已乃者合宮肆祀百辟駿奔顧瞻
舊人方在外服懷想風聲之懿豈忘霈澤之加保寧
軍節度婺州管內觀察處置等使持節婺州諸軍事
婺州刺史上柱國始平郡開國公食邑六千六百戶
食實封二千戶馮京敦大敏明肅恭和惠名冠多士
徧居臺省之高華德合前人遂攬兵政之微密納之
煩劇而不亂涅於渾濁而不緇心與善人望推前輩
丙吉雖病以陰德而復全蕭傳出藩懷本朝之雅意
頃膺旄節之重以當趙魏之衝坐使中朝不勞北顧
宜衍大邦之履仍加食之封於戲身歷四朝履夷
嶮而一致心通庶事閱義理者尤多豈以中外之殊
而廢謀猷之告介爾眉壽左右皇家可特授依前官
職加食邑五百戶食實封二百戶勲封如故主者施
行

劉昌祚加恩制

門下朕因路寢之正舉合宮之祠禮樂法商周之隆
車服兼漢唐之盛出款原廟還享上穹職貢充庭工
師復位兵衛如植旌旆不煩實惟有人以克成禮殿
前副都指揮使武康軍節度洋州管內觀察處置等
使持節洋州諸軍事洋州刺史上柱國彭城郡開國

侯食邑一千九百戶食實封一百戶劉昌祚天資鷲
勇性本忠良結髮征羗號馬上之飛將授鉞臨塞皆
關中之要區方西鄙之須材會中軍之謀帥畀之旄
節之重付之貔虎之師歸閱浹旬旋聞輯睦逮此熙
成之慶賴其宿衛之勤既增封爵之崇仍加真食之
厚於戲古之明主立賞以待有功古之賢將有功而
耻自列服予霈澤之異勉爾勲名之思貴當益恭老
當益壯可特授依前官職進封開國公加食邑七百
戶食實封二百戶勲如故主者施行

文彥博太師河東節度使致仕制

門下周公未嘗之魯老亦居豐留侯晚雖強食終不
任事蓋委寄之重初無間然而止足之風所不敢廢
惟我耆舊歷事 祖宗纘服之初復命以位雖師保
之地優佚不煩而丘樊之心朝夕以請布告在位俾
聞高風太師平章軍國重事上柱國潞國公食邑二
萬八千一百戶食實封一萬一千八百戶文彥博克
孝而忠允文且武其在師旅有方召之勲其在朝廷
有崇璟之業士民視其去就夷狄震其威名時更四
朝躬蹈一節 先皇帝愍勞以事既許其歸越予訪
落之年凜有涉淵之志起之既老待以仰成出八五

年終始全德進而論道日聞典訓之言倚以折衝卒靖邊防之警委成功而不處指莫景以求安勤請屢聞誠心莫奪顧瞻閭井近在洛師郭氏有永巷之嚴裴公有綠野之勝豈以簪紱之累久致形氣之勞貴極上公既無復加之爵秩分領全晉仍畀久還之節旄增廣舊封益衍真食殫盡人臣之寵歸從父老之游於戲音聲不遐尚有就問之禮几杖以俟復期親祀之陪勿以進退之殊而廢謨猷之告式燕且譽俾壽而康可特授太師開府儀同三司太原尹充河東節度管内觀察處置等使致仕加食邑一千戶食實

封四百戶勲封如故仍令所司擇日備禮册命主者施行

除馮京彰德軍節度使制

門下備河禦胡固天下之要地建都置守皆前世之重臣雖中外之無虞實根本之所在非其人則視若虛邑得所付則坐爲長城是用敷告外廷復任舊老保寧軍節度婺州管内觀察處置等使持節婺州諸軍事婺州刺史知大名府兼北京留守司公事畿內勸農使充大名府路安撫使馬步軍都總管上柱國始平郡開國公食邑七千一百戶食實封二千三百

戶馮京名冠多士望高累朝和而不同性有鹽梅之德磨而不磷志懷金石之堅入則參領萬幾出則蕃屏四國頃加旄鉞之寵俾臨趙魏之衝宜民宜人靖重而不擾無怨無惡樂易而可親朕不忍奪民所安故命易節而處升視冬卿之秩併加邑戶之封蓋官宿其業則事無不知民習其上則信而易使方今河流所出近在都城之西故道已堙而歲有衍溢之虞北流旣駛而方患隄防之缺介衆所利卿靡弗聞舊德所臨朕亦何慮於戲兵民細故責之將佐而可爲邦國大猷非吾耆老而誰聽勉盡白首之節以寬北顧之憂可特授檢校司空持節相州諸軍事相州刺史充彰德軍節度相州管内觀察處置等使再任知大名府兼北京留守司公事畿內勸農使充大名府路安撫使馬步軍都總管仍加食邑五百戶食實封二百戶勲封如故主者施行

詔敕四十一首

尚書左丞韓忠彥免弟嘉彥尚主不許不允
詔二首

勅忠彥覽所劄子奏伏聞 聖恩宣召臣弟嘉彥赴禁中引見欲令尚主伏望以長主之貴更加慎擇事

具悉惟先正魏公光輔三世有勞宗祧雖沒元身其報在後先皇帝追懷忠厚之德許以婚媾之親逮茲奉行實出遺旨雖卿以惡盈爲戒深欲固辭而朝廷謂無德不酬莫回成命謙冲之意嘉歎不忘所請宜不許故茲詔示想宜知悉

昔王導以輔政之業郭子儀以專征之功肆其後人皆聯戚里衣冠之盛晉唐所稱未聞其子孫以盈滿爲言而朝廷聽辭避之請也今予先正實配前人築館之恩報功斯在蓋便蕃之寵屬於乃父而事不在卿選擇之命出於先朝而朕不敢易體茲至意罔或固辭所請宜不允

門下侍郎孫固乞致仕不允仍給寬假詔

勅孫固省所劄子奏春中以被病危重乞一致仕名目聖恩深厚未忍遽從今氣血益以羸耗在假已二十日坤成聖節不能勉強趨赴伏望聖慈察臣出於至誠曲成其志事具悉朕以篤老之臣於國有肝膽之親而命以位非責其趨走之勞也卿以垂白之年許朕以股肱之用而受其託非徒爲朝謁之勤也今者眷倚之厚朕方未怠聞望之隆人亦無間徒以壽日方迫疾勢未平不能造朝遽欲謝事旣非朕

所以待卿之本意亦非卿所以事朕之素心人其謂何朕實未諭既命賜告以自養卿其少安而勿違所請宜不允仍給寬假將治故茲詔示想宜知悉

韓忠彥乞外任不許不允詔二首

勅忠彥覽所劄子奏兄爲執政弟爲駙馬未有似此體例不若自求罷免伏望許解近司處之外任事具悉魏公之功沒而不朽先帝之命久而不忘吾有懷舊勲擢卿於六官之貴繼因遺旨屬嘉彥以副車之姻推吾此心蓋非一日本將并錄其子以寵其父豈欲獨收其弟而棄其兄比因力辭嘗已臨諭有

唐故事非獨一家本朝已行亦存近比尚茲勤請殊失眷懷吾欲伯仲相望於朝以示國家不替舊德起視乃職罔復煩言所請宜不許故茲詔示想宜

知悉

勅忠彥省所劄子奏兄爲執政弟爲駙馬未有似此體例不若自求罷免伏望許解近司處之外任事具悉君臣之間以誠意相遇則事無不可以形迹爲務則理或難通朕惟魏公歷事三朝咸有一德功存社稷澤及子孫追懷茂勲述行先志以卿性資忠良久更事任可以寄股肱之託以嘉彥業履純潔方及冠歲可以與姻親之選各隨材分以答勲勞由義而

言略無嫌疑之可避顧卿何慮特假形迹以爲辭況考之古今亦有成例祇服朕訓何卹人言其罔復辭以安厥位所請宜不允故茲詔示想宜知悉

孫固乞致仕不允詔

勅孫固省所三上劄子奏乞致仕事具悉卿以疾辭位義也而朕以事留卿亦義也既皆爲義則卿之所執雖未爲過而朕之所設亦豈遽非乎尚何力辭以廢成命今者四方無虞廟堂之上非有艱難之慮緩急之政也卿疾雖未復而勢已有間日雖稍久而事則無損誠能得告以養疾疾愈而造朝宜若於體無害也治疾以安身身強而圖報宜若於國有補也尚何所疑而辭之不已乎勉循前命無復煩請所請宜不允故茲詔示想宜知悉

趙君錫免刑部侍郎不允詔

勅君錫省所奏辭免恩命事具悉朕以卿仁恕不苛必能哀矜有罪寬平盡下可以詳究微文矧在東臺逮茲累歲觀封駁之無避知廉直之有餘衆言既孚朕志亦定往祇成命罔復固辭所請宜不允故茲詔示想宜知悉

呂公孺免戶部尚書不允詔

勅公孺省所奏辭免恩命事具悉方今賦有常供無暴歛之入用循故事有不給之虞朕眷求長材委以足用虛位以俟累月于茲卿家本世臣早更事任頃涖京邑亦既久勞辭而不居誰使任事所請宜不允故茲詔示想宜知悉

太皇太后明堂禮成罷賀賜門下手詔

勅門下 皇帝臨御海內晏安五經季秋再講宗祀克有君德以享天心顧吾何功獲被斯福今有司因天聖之故事修會慶之盛禮將俾文武稱慶于廷吾自臨決萬機日懷祗畏豈以菲薄之德自比章獻之

明知復 皇帝致賀于禁中羣臣奉表于闈左禮文既具夫又何求前朝舊儀吾不敢受將來明堂禮畢更不受賀百官並內東門拜表故茲詔示想宜知悉
太師文彥博乞致仕不許不允詔二首

勅彥博覽所劄子奏陳乞致仕事具悉吾之用卿本以公義卿之事人亦非私意起於既謝凡以爲民矧於陟降之間未覺筋力之憊苟誠在愛民則愈老而民不厭誠在許國則愈久而君益親卿既以道深結於朝而欲以私自便而去義有未可非吾所知所請宜不許故茲詔示想宜知悉

勅彥博省所劄子奏陳乞致仕事具悉絜去就之分厲廉耻之風此新進之士立名於世者之所爲也以朝廷爲家以社稷爲悅此老成之臣竭忠於國者之所志也卿昔以八十之年不卹小廉出循朝命旣得之矣歲月未幾體力猶康遽欲告歸朕所未喻豈以老成之望而蹈新進之爲謂宜少安卒輔予治所請宜不允故茲詔示想宜知悉

文彥博致仕再免兩鎮不許不允詔二首

勅彥博覽所再上劄子奏辭免恩命乞只以河東一鎮致仕貼麻處分事具悉朝廷數以兩鎮命卿而卿率以固辭獲免抑有由也或特恩之橫被或謝事而得休歷考前後所加猶是公相常禮今耆老而復起起而復歸率自帝師之隆未見前人之比兼持旄節夫豈過哉已却封章姑止可也所請宜不許故茲詔示想宜知悉

勅彥博省所再上劄子奏辭免恩命乞只以河東一鎮致仕貼麻處分事具悉命由君出禮以義起豈必皆有故事然後得以奉行卿有德有年在朝不見其比或出或處自昔未聞其人矧復兩鎮之異恩旣有先朝之成命蓋昔日之勲未若今日之盛則今日之

受豈必前日之非勉聽朕言祇受冊禮所請宜不允
故茲詔示想宜知悉

文彥博三免兩鎮不許不允詔二首

勅彥博覽所三上劄子奏辭免兩鎮恩命止授河東
一鎮致仕事具悉卿股肱四朝而爲二帝師求之古
今未見倫擬得謝而去在禮宜殊佩相印持將鉞以
爲未足故并付以蒲中漢中之衆所以華國非特以
爲卿寵也今辭之不已深所未喻吾志先定卿其勿
辭所請宜不許故茲詔示想宜知悉

勅彥博省所三上劄子奏辭免兩鎮恩命止授河東
一鎮致仕事具悉朝廷之命審而後發非力辭之所
得免也卿親對便坐繼三上章詞已竭矣而朕之素
心終不可易且卿兩以帥臣歸第前無其比而後無
其繼雖兼擁二節孰以爲非者哉所請宜不允故茲
詔示想宜知悉

文彥博免兩鎮許允詔二首

勅彥博覽所累上劄子奏辭免兩鎮恩命乞祗帶河
東一鎮致仕事具悉恩之不勝義舊矣卿旣告老而
吾以至恩授卿二鎮朝有成命而卿以大義執節固
辭雖欲不聽其如義何況卿所陳關國之體以謂宗

室之故不當施於羣臣而非法所加亦難行於治世
詳之以禮衆實謂宜吾豈以一時之恩而廢天下之
義哉勉從所請還卿舊節再惟誠悃不忘嘉歎特依
所請換授依舊領河東節度使致仕故茲詔示想宜
知悉

勅彥博省所累上劄子奏辭免兩鎮恩命乞祗帶河
東一鎮致仕事具悉朕惟先朝嘗以兩鎮寵綏大
臣者惟魏國忠獻韓公與卿爲二忠獻旣已一辭於
前而卿亦嘗再辭於後先帝亮其至意爲改冊書
天下旣頌先帝之明復嘉二臣之義今朕嗣守成
憲率而行之以卿累章稽之故事實無違者古之君
子愛人以德朕豈忘斯義而廢卿言特依所請換授
依舊領河東節度使致仕故茲詔示想宜知悉

河東官吏軍民示諭勅書

勅河東官吏軍人僧道百姓等朕以文彥博四朝舊
臣一時耆德起於旣老之後輔予纘服之初奏章屢
陳歸意莫奪師臣之貴爵無復加將鉞之崇恩俾還
舊矧爾故鄉之父老安於前尹之威懷比聞冊書想
多歡慰今特授文彥博太師開府儀同三司太原尹
充河東節度管内觀察處置等使致仕加食邑一千

戶食實封四百戶勳封如故故茲示諭想宜知悉將士等各得平安好叅佐官吏僧道耆壽百姓等並存問之遺書指不多及

孫固乞致仕不允詔

勅孫固省所劄子奏自去年正月未涉夏兩次重病蒙聖恩寬假得遂生全然臣一年飲食減少氣力羸乏仰干天聽以祈矜憫許臣休致事具悉朕屬任耆老本非旅力之求卿被遇股肱豈可一朝而去雖自以羸瘠爲苦朝謁多艱然而遇事不廢思慮之明進對每有諮謀之益何損於政遽當告歸矧今邊防無異域之虞而宥府右尚寮之助勉親藥餌仰循邦家神之聽之介以壽考所請宜不允故茲詔示想宜知悉

韓忠彥免同知樞密院不允詔

勅忠彥省所劄子奏伏覩除同知樞密院伏望追改新命事具悉朕以西樞總領兵要綏御邊防事有失於須臾患或貽於久遠是用輟卿左轄之要付卿右武之權分職雖殊柄用則一易地而已力辭謂何矧復親黨之微嫌豈爲腹心之深累勉起視事尚體眷懷所請宜不允故茲詔示想宜知悉

蘇頌免尚書左丞不許不允詔二首

勅蘇頌覽所劄子奏辭免恩命事具悉卿家世名臣少小篤學在昔圖史包括無遺本朝典章指陳可數中以直道廢於一時終守金石之姿不爲燥濕所變白首在列丹心甚明進轄中臺斷自吾意勉服休命勿爲固辭所請宜不許故茲詔示想宜知悉

勅蘇頌省所劄子奏辭免恩命事具悉卿日奉寶訓進讀金華詞氣裕然進退以禮朕旣已熟聞講解之益抑又究觀業履之詳臺中紀綱責在丞轄卿其以平昔舊聞施於政事朕亦以所參庶政驗卿前言母

爲固辭當取成效所請宜不允故茲詔示想宜知悉

蘇頌再免左丞不許不允詔二首

勅蘇頌覽所再上劄子奏辭免恩命事具悉卿昔在仁祖之朝已預石渠之選一時同列于今幾人結髮翰墨之場白首忠信之節議論如故志意不衰擢任柄臣蓋旌耆德辭至于再殊匪吾懷所請宜不許故茲詔示想宜知悉

勅蘇頌省所再上劄子奏辭免恩命事具悉二轄之司萬幾所萃不明故事政或失於紛更不達當今用或病於膠固朕以卿誦習典章而不厭更閱義禮者

尤多擢實左右之聯實求咨訪之益雖力辭之不已顧成命之難回所請宜不允故茲詔示想宜知悉

知樞密院孫固乞避親不允詔

勅孫固省所劄子奏伏覩除韓忠彥同知樞密院事緣臣有女嫁忠彥之弟純彥有此親嫌理合迴避伏望罷臣知樞密院事獲遂休退事具悉朕惟先朝同秉樞機之臣有以近親不許避免之比是以並建長貳之懿不取形迹之嫌今卿以謂無他同寮請循著令雖祖宗舊法不可遂忘而君臣同德姑爾無害豈以纖芥之故遽爲退老之謀再閱謙詞徒用嘉歎所請宜不允故茲詔示想宜知悉

周尹進興龍節無量壽佛敕書

勅周尹省所進奉興龍節無量壽佛一軸事具悉佛心無爲佛壽無量有能繪其真相俾來獻於誕辰勉我以清淨之風祝我以期頤之福忠勤深至嘉歎不忘故茲示諭想宜知悉夏熱汝比好否遣書指不多及

范百祿免侍讀不允詔

勅百祿省所上表蒙恩除兼侍讀伏望特寢誤恩事具悉卿秉心直諒臨事莊栗頃貳憲部持法寬平不

屈於權要及領選曹馭吏詳察不撓於煩劇其達於吏治朕既知之矣至於通經博古慨然正論昔由此進今以是老朕寤寐格言而獨未聞焉挾策進讀其勿復避所請宜不允故茲詔示想宜知悉

趙君錫免吏部侍郎不允詔

勅君錫省所奏辭免恩命事具悉卿孝友慈祥可以施於有政寬粟柔立可以命之有家適從議讞之勞遷領銓綜之重蓋因已試之效非有躡等之嫌選劇務繁不可久曠勉力思報賢於固辭所請宜不允故茲詔示想宜知悉

文彥博免孫男康世章服不允詔

勅彥博省所劄子奏辭免孫男康世章服事具悉卿以耆老給扶子孫以進見授服前後既異豈以重復爲疑奏牘上聞何其畏慎之過已頒成命罔復重辭所請宜不允故茲詔示想宜知悉

孫固乞致仕不允詔

勅孫固省所劄子奏以老病情迫累乞休致未賜開可緣年齒晚暮疾病侵陵今日筋骸困憊至此無復安全之理伏望哀憐早降俞旨事具悉卿逮事 聖考於潛官與聞 先朝之大政貴老求舊屬任之意

方隆引疾告歸退避之言已甚君臣同德夫豈當然
體力雖衰姑復自勉所請宜不允故茲詔示想宜知
悉

宰相呂大防等爲旱乞退不允詔

勅大防等省所劄子奏時雨不足乞罷免職任事具
悉歷時告旱歲事可虞精禱未孚神貺猶嗇朕側身
思咎終夕靡遑卿等躬任燮和志同憂患雖引義自
責大臣之體則然而釋位求安有國之計何賴尚講
救荒之政以助憂民之誠苟能使旱不爲災則朕復
何咎所請宜不允故茲詔示想宜知悉

太皇太后以旱賜門下詔

勅門下吾母臨御四方親決萬務清心克己凡以爲
民而天意弗咸歷時災旱宿麥幾盡秋稼未立饑饉
旣至疫癘將起齋祠雖切漠然弗應吾則不德民實
何罪中自循省寢食皆廢豈政治失當事之害物者
尚多上下否塞情之不通者非一刑或不稱其罪用
或不當其人有一于斯皆足以上拂天心下擾民聽
循致斯旱咎實在吾皇帝遇災恐懼不敢自佚旣命
有司降食避殿罷五月朔朝吾亦自今月二十三日
後減常膳側身念咎固無吝於改爲協德濟民尚有

求於列位故茲詔示想宜知悉

皇帝以旱賜門下詔

勅門下朕奉承統業于今五年臨御崇高未達庶政夙夜祇懼若涉淵冰常恐德之弗類無以下慰民望上當天心今者冬雪不效春雨弗若逮此孟夏旱災如焚麥不充食禾未出土歲事凜凜民且狼顧雖禱祠備至而神莫之答惟循省自克則災或可消意者政令寬弛吏或爲害而莫懲歟賦役失當民病於事而莫察歟忠言有壅而未達賢才有抑而未用歟念之雖勤行則未至昭明恐懼之誠意庶幾陰陽之不違可自今月二十三日後減常膳不御前殿及將來五月一日罷文德殿視朝朕上奉東朝深愧常珍之日缺下臨庶尹猶冀嘉言之上聞苟利於人其無不可故茲詔示想宜知悉

鄧溫伯免翰林承旨不許不允詔二首

勅溫伯覽所奏辭免恩命事具悉卿以文史足用久在禁林慎靖寡尤首承密旨雖云新命率皆前官尚此盤桓固求引避旣違朝廷號令之信徒有道路進退之嫌其尚亟前勿爲煩請所請宜不許故茲詔示想宜知悉夏熱卿比平安好遣書指不多及

勅溫伯省所奏辭免恩命事具悉翰林以議論爲官而承旨以年德爲選茲所以歷求多士復用舊人卿旣父在朝廷當識朕意遷延退託雖多長者之風號令文詞宜得宿儒之用成命不反固辭實難所請宜不允故茲詔示想宜知悉夏熱卿比平安好遣書指不多及

呂大防等再爲早乞退不允詔

勅大防等省所再上劄子奏近以旱暵爲沴乞罷職任伏蒙詔命不從所請伏望早賜施行事具悉常暘爲災民瘠已甚朕爲之父母而卿等爲朕股肱相與憂之固其任也然至於求罷職事則匪朕心朕旣自以失德爲疑卿等姑復以批政爲念因民情而圖救脩早備以防微旣能夙夜在公豈必逡巡去位朕志如是卿其少安所請宜不允故茲詔示想宜知悉

彰德軍官吏軍民示喻敕書

勅彰德軍官吏軍人僧道百姓等朕以魏都要地守難其人馮京名臣姑易其節假爾鄴城之重壯我留鑰之聲矧旄鉞之得賢抑吏民之增氣已頒大號想慰輿情今特授馮京檢校司空持節相州諸軍事相州刺史充彰德軍節度相州管內觀察處置等使再

任知大名府兼北京留守司公事畿內勸農使充大名府路安撫使馬步軍都總管仍加食邑五百戶食實封二百戶勲封如故故茲示諭悉宜知悉將士等各得平安好叅佐官吏僧道耆壽百姓等並存問之遣書指不多及

馮京免彰德軍節鉞不許不允詔二首

勅馮京覽所上表辭免恩命事具悉老臣所在衆志自安邊鄙震其威名吏民習於條教事可坐定政無更張是用因魏都之舊疆換鄴城之新節孚號旣布僉謀畢同方慶得人之難遽覽飛章之請吾命惟允卿其勿違所請宜不許故茲詔示想宜知悉夏熱卿比平安好遣書指不多及

勅馮京省所上表辭免恩命事具悉魏博重鎮舊用老臣旄節寵章制存易地朕以卿著稱多士旣歷三朝勵治此邦於今再歲復欲借君以爲重蓋亦因民之所安豈其固辭而可得免祗服成命永綏比郊所請宜不允故茲詔示想宜知悉夏熱卿比平安好遣書指不多及

文彥博免致仕合得五人恩澤詔

勅彥博省所劄子奏今來致仕依條合得五人恩澤

乞賜寢罷事具悉朝廷以恩遇老臣無所不厚而卿以禮自克辭不敢居卿既能見得思義以律貪夫朕豈不能成人之美以明晚節蓋知損之爲益是以高而不危所請宜允故茲詔示想宜知悉夏熱卿比平安好遣書指不多及

范百祿免翰林學士不允詔

勅百祿省所上表辭免恩命事具悉卿蚤以直言預英祖之選中以直道干神考之知侃然立朝老而益劬朕欲訪經籍討論之助求文章潤色之工旣已寘卿金華之中茲又擢卿玉堂之上矧復班六曹之首無躡等之嫌繼仲父之賢有傳家之慶朝有成命勢不可違時方須才義亦難奪所請宜不允故茲詔示想宜知悉

不勝宜其悲

幾人可與期才彫才美亦難全世謂世不以好
世謂世不以好世謂世不以好世謂世不以好



國家圖書館, NATIONAL CENTRAL LIBRARY, TAIWAN, R.O.C.

樂城集卷之三十四

宋西蜀蘇轍子由著

明東吳

王執禮子敬

顧天叙禮初

全校

北門書詔祈祝九十首

批答四十四首

門下侍郎孫固乞致仕不許不允批答二首

覽表具之吾不出帷幄臨御家邦實賴股肱之良以
持綱紀之要於其進退顧可輕聽之哉卿頃自近藩
擢貳東省本以年德之故非有筋力之求若夫正顏
色出詞氣使人望之而忠誠可信鄙倍自遠斯可矣

豈以一病未能造朝遂欲舍而去哉誠請雖勤於義未也所請宜不許

省表具之卿事 先帝於東宮覽兵要於西府忠厚之節始終不渝朕敷求舊人所得無幾親之信之以爲手足尊之重之以爲耆龜非有大故不可棄也豈以一病而輕去哉雖會朝之常儀與坤成之大慶未能自力蓋亦何疑尚寧乃心終輔予治所請宜不允

劉昌祚免殿前副都指揮使不許不允批荅二首

覽表具之衛兵虛帥累月於茲召節亟還辭章繼入

既匪眷懷之素復稽總護之宜與其飾說以固辭孰若勤職而圖報所請宜不許仍斷來章

省表具之卿結髮兵間著績境外歸總環衛本以次遷懇避節旄再形謙請顧成命之不及宜就職以無辭所請宜不允仍斷來章

文彥博乞致仕不許不允批荅二首

覽表具之卿以衛武之年踐呂尚之位安然無作則功名自隆默然無言則卿尹自化當以至靖之德坐鎮羣動之樞不勞施爲以億筋力今者初畢元祀遽聞告歸幾務多閑朝謁非病屬任旣重披閱爲疑方

假百年之令猷以觀庶尹之成效來請雖切殊匪吾心所請宜不許

省表具之老而謝事古之禮也而勢未可去蓋有不
得謝者矣卿元豐之間引年而歸隆知足之風元祐
之初承詔而起敦急病之義既進退之兩得謂始終
之不渝方朝廷政事之優閑而卿志氣之康裕雍容
師保之地儀刑卿士之前朕之望卿意未有艾誠請
雖至義不可從所請宜不允

呂大防免明堂恩命不許不允批荅四首

覽表具之吾聽政九重遠今四載觀孝孫之致享奉
文子以配天神人既和禮樂備舉終事如素孰尸厥
功顧維元臣宜與有慶往服休命其勿復辭所請宜
不許

省表具之朕臨御諸夏俛仰四年格茲秋成躬致禋
祀燮和鎮撫卿與有勞豈惟一朝顯相之勤實賴同
德贊襄之益國有成憲時錫寵章其用復辭勉服休
命所請宜不允

覽表具之寵至而辭抑惟常禮義當而受顧亦何疑
永言宗祀之嚴實賴顯相之助加惠百辟用遺一人
豈其股肱之良而無封邑之寵成命不易祇受勿違

所請宜不許仍斷來章

省表具之朕奉祀合宮祇見上帝諸侯致享邇臣侍祠凡執豆籩咸被慶賜矧予元宰實代天工獨執謙言孰先多士勉膺成命罔復固辭所請宜不允仍斷來章

皇伯祖宗暄免恩命不許不允批荅四首

覽表具之季秋致享群后在廷卿奉祀濮園首帥宗子相我熙事不忘肅雍逮茲禮成宜受帝祉矧朝廷之寵數皆祖宗之舊章雖執謙辭莫回成命所請宜不許

省表具之朕推廣帝澤覃及海涯惟英祖伯仲之親與濮園丞嘗之奉顯膺異數實先諸臣矧茲均福之餘本緣升侑之慶祇服成命其又何辭所請宜不允

覽表具之無言不酬無德不報古之道也總章之祀成于顯相雖駿奔走執豆籩皆被其澤矣而況於王乎雖復固辭難遂來懇所請宜不許仍斷來章

省表具之屬尊則禮必異親近則寵必先國之舊章朕何敢廢矧惟合宮之祀實賴顯相之勤雖欲不居懼失常典載嘉誠請難徇固辭所請宜不允仍斷來

章

皇叔祖宗祐宗楚免恩命不許不允批荅四

首

覽表具之吾祇命元孫躬饗上帝父兄在列君臣肅然熙事告成大需時舉宜因休命之降以爲羣臣之先執謙而辭殊匪吾意所請宜不許

省表具之朕躬享上帝陟配文考事夫事親一舉而得既受帝祉懼不敢專思與父兄共享其福若尊屬懿親辭而不有謂羣臣何其聽朕命服此休寵所請宜不允

覽表具之祭祀之澤神所照臨祖宗之舊吾無加損卿侍祠夙夜終事肅雍既同百工咸被光寵豈獨絜已固陳謙詞懇請雖堅成命莫改所請宜不許仍斷來章

省表具之朕既有事于明堂凡執事之臣咸與有慶矧諸父兄之貴朕所尊禮而祖宗之所顧享者耶辭至於再深所未喻尚體至意無復煩請所請宜不允仍斷來章

皇弟佶似憇免恩命不許不允批荅四首

覽表具之吾奉承先緒成就諸孫宗祀合宮茲見元

良之盛大需寰寓特先仲叔之賢率時舊章錫以休命體我眷厚其勿謙辭所請宜不許

省表具之兄弟之義譬如手足憂喜同之朕有事于合宮徼福于上帝中外臣庶咸被其澤豈予諸弟之親而有不遍者乎朕命惟允其勿辭可也所請宜不允

覽表具之席父兄之貴居王公之尊典禮既行爵命自至茲以廣愛豈將期驕與其被命而力辭孰若居寵而知畏祇服異數毋忘益恭所請宜不許仍斷來章

省表具之宗祀文王以配上帝此周禮也議于諸儒歷世不決逮我聖考一言而定朕奉而行之罔有增損至於禮樂之文赦宥之澤咸有成法非朕所私豈余諸弟之賢弗迪前人之訓祇服寵命其勿固辭所請宜不允仍斷來章

劉昌祚免恩命不許不允批荅四首

覽表具之卿國之虎臣帥我爪士總章大祀宿衛有勞宜爲六軍之先以承大賚之慶辭而不有殊匪吾心所請宜不許

省表具之卿爲環列之尹職在訓齊方總章之祠勞

於宿衛禮成加惠國有舊章上自將帥之聯下逮什伯之長咸錫休命罔遺一夫苟將獨辭何以率衆所請宜不允

覽表具之朝廷治安將帥閑暇因慶推賞或疑無名孰知養之之優蓋由責之之重鎮靖吏士折衝蠻夷苟誠能之尚有大者往服成命毋復固辭所請宜不許仍斷來章

省表具之朕三歲親祠百辟來助因上穹之降福縻好爵以廣恩非獨爾私尚將何避若夫闔外之寄師中之謹蒞既不以私假人卿亦宜以功受祿今此成命其勿固辭所請宜不允仍斷來章

中書侍郎劉摯免恩命不許不允批荅二首覽表具之吾雙日而朝勤勞政事四歲之久庶幾成功幸斯民之小康見合宮之再享豈伊寡德實賴群公苟天下之信安夫何賞之不可大賚之慶胡以辭爲所請宜不許仍斷來章

省表具之朕歷三歲以親祠罄四海之來祭雖祖考之德足以致此而左右之助豈其無人卿夙夜在公直諒不倚成我熙事爾勞居多惠澤之均率由舊典已行之命其罔固辭所請宜不允仍斷來章

尚書右丞許將免恩命不許不允批荅二首
覽表具之祭有大澤惠及庶工凡自通籍之臣莫不
指日而待卿位在丞轄手執紀綱辭而不居衆或未
喻矧成命之不反宜勉受以勿違所請宜不許仍斷
來章

省表具之朕祇見昊穹嚴奉文考卿蚤以儒術用於
先朝益圖任有求舊之心而顯相有逮事之感實先
多士推霈渥恩其勿固辭往服成命所請宜不允仍
斷來章

文彦博致仕免兩鎮不許不允批荅二首

覽表具之凡自一命告老于朝考之舊章必加以爵
蓋所以敦始終之義礪廉退之風國之故常吾敢失
墜卿自祖宗之世兼將相之權得謝神考之朝
既履師臣之貴老而復起功成告歸豈以上公之尊
不如命士之寵兼鎮之重故事可推雖曰非常之恩
孰是元臣之比勉膺成命毋煩固辭所請宜不許
省表具之朕越自冲年嗣承大統念昔師臣之美起
卿謝事之餘父老在朝國勢增重誨言時至典學日
新方當問道之秋遽聞歸老之告留之不可爵之無
加推考舊章以錫成命因有餘而戒得雖嘉乃心念

不足於報功亦伸朕志所請宜不允

韓忠彥免同知樞密院不許不允批荅二首
覽表具之吾以二三大臣分領兵政庶務雖職之煩
簡或異而事之緩急畧殊然而屬任惟均出入無間
卿既與聞國論豈不明吾此心安有總轄中臺則足
以參幾微之決至於議論西府則不能處軍旅之宜
尚體眷懷毋復謙請所請宜不許仍斷來章

省表具之惟乃先正歷事累朝經國論道有賢相之
規治兵禦戎得名將之畧風績猶在子孫不忘今朕
舉以試卿意卿得其遺意勉膺成命其勿煩請上可
以幹國之蠱下可以信父之志所請宜不允仍斷來
章

蘇頌免尚書左丞不許不允批荅二首

覽表具之國方治安典章文物可以御世朝有耆老
風采議論足以服人吾以卿夙守名節練達故事舉
而用之豈苟而已勉起就職毋廢成命所請宜不許
仍斷來章

省表具之朕若稽古訓况於祖宗之法何所不考思
得良士達於今昔之故明以來詔以卿立朝滋久稱
道不亂擢寘綱轄之地以爲先後之寄明體茲意毋

復來請所請宜不允仍斷來章

呂大防等乞御正殿復常膳不許不允批荅
二首

覽表具之吾勉而臨政志切爲仁凡克已以濟民皆
力行而不悔矧今久旱傷稼憂在阻饑豈以菲食逾
旬指爲難事而卿等因是微澤率然上章雖嘉乃誠
殊匪吾意夫旱災之後荒政之所備者尚煩秋種雖
生終歲之可虞者非一與其君臣釋然而忘患孰若
上下相儆以圖安姑存降食之文以示畏天之實所
以

省表具之歷時不雨天之告戒已深因旱責躬朕之
誠意未怠今雖小雨繼至而二麥已傷饑饉有已見
之形禾黍無必獲之理卿等遽陳誠請求復故常朕
仰畏天威下念民瘼深愧治朝之盛未知肉味之甘
矧復 神母愛民憂心如昨朕獨何意遽舉舊章須
歲事之有成與天意而皆復所請宜不允

第二表不許不允批荅二首

覽表具之吾性本恭儉居不求豐時方旱災懼若無
措是用側身念咎貶食以祈上將荅於天心下以慰
於民望今者膏澤旣至黍稷可期此則上帝仁愛之

深斯民鰥寡之幸在吾祗懼何敢弭忘卿等備位股肱亮此誠意豈可因風雨之微順忽陰陽之久愆方歲事之多虞姑復少竢苟民食之既足吾亦何辭所請宜不許仍斷來章

省表具之朕獲守丕基未習師保之訓不有善政以干陰陽之和去冬以來時雨弗若譴告之久逮今半歲有餘戒懼之誠豈以一雨而足永惟會朝之禮百辟具來膳飲之常庶珍咸在方斯民之未裕匪朕意之所存卿等寄在腹心志同憂樂奉我以黼宸之盛不若處我於無過之中厚我以玉食之華不若助我以兼濟之善所請宜不允仍斷來章

第三表不許不允批荅二首

覽表具之乃者雩而得雨牟麥既傷田雖可耕禾黍猶病吾惟農夫之不易歲事之多艱未忘戒懼之誠不遑口體之養今者時雨既至秋稼稍蘇卿等遽與處官求信前請吾將推先王菲食之意以終斯民豐歲之所行之雖久而不謂勞卿其姑止以成吾志所請宜不許

省表具之朕庶政不明常暘爲譴奔走祠望降黜典常亦既逾時僅而獲雨永惟天意之難復民食之未

充庶幾終歲之登成未免茲心之怵惕虛治朝之列位損內養之常羞於朕心猶曰未安而卿等遽以爲請昔成湯自省以六事楚莊常懼於無災朕旣嘉前王之小心豈以一雨而遂懈所請宜不允

第四表許允批荅二首

覽表具之吾聞天之降異本以仁愛人君君知畏天乃克保有邦國故旱雖傷稼而恐懼修政則變或可消雨雖應祈而怠忽忘災則歲未可必頃者膏澤荐至羣言上聞吾夙興念此降食如故今勤請繼至屢却弗回惟衆意之不可重違故事之不可終廢膳羞之設雖勉強以復常修省之心終頃刻而不去尚願多士同致此誠所請宜許

省表具之畏天卹民本朕躬平日之志避殿損膳抑祀宗故事之常乃者亢陽爲災甘澤未遍朕祗率舊典以行本心茲因屢請之勤審知時雨之足苟無憂於民食豈必廢於邦常朕旣用僉言正坐食珍不改國朝之舊卿等亦廣吾意修政謹備常若水旱之來所請宜允

書九首

皇帝明堂宿齋第一次問太皇太后聖體荅

書

太皇太后致書于皇帝祇事總章竭誠齋宿上承天以報本內嚴父以顯親克慎多儀永膺繁祉

皇太后答書

皇太后致書於皇帝國有舊章禮嚴宗祀祓齋殿幄之祕和調玉食之精益慎孝思以逆純嘏

皇太妃答書

皇太妃致書于皇帝齋居外朝躬承大祀穆然重屋之遠煥乎右坐之嚴祇率舊章以承天貺

第二次太皇太后合書

太皇太后致書于皇帝祀嚴三歲卜告中辛旣結佩以齋心將奠玉而致享克勤陟降以接明靈

皇太后答書

皇太后致書于皇帝講禮合宮祇視上帝將儀式於文考以教孝於諸侯尚慎威儀以承佑享

皇太妃答書

皇太妃致書于皇帝上帝降衷文考升侑精誠盡於齋宿進退比於樂文罔有告勞以須降福

皇帝謝禮畢太皇太后答書

太皇太后致書于皇帝奉承天休續嗣先烈四及季

秋之吉 再款合宮之嚴禮成不違神貺昭荅益懋仁孝之本以格天人之和

皇太后荅書

皇太后致書于皇帝秋物豐成克致粢盛之奉羣心祇若式觀職貢之來內盡純誠外殫庶物遂舉多儀之盛何慚累聖之隆降福孔多克勤無斁

皇太妃荅書

皇太妃致書于皇帝絜齋居外有夙夜之勤旋辟致恭盡禮樂之變仰以報功於上帝俛以祈福於斯民及此休成益亦勞止永膺福祚以保家邦

祝文十二首

北京南開二股河祭河瀆星辰祝文

維年月日嗣天子名謹遣某官某敢昭告于尾宿星乃者暑雨過常河流東溢因有司之來告請以時而決疏兵役暴興冀明靈之垂祐民心苟利幸開塞之協宜尚饗

景靈宮安鐵水窻祝文

維年月日皇帝遣某官某致祭于里域真官伏以靈宇邃嚴周渠捍密有司繕故以時易新既命消辰敢告經始尚饗

後苑祈晴祝文

維年月日皇帝遣某官某請僧三七人於後苑華景亭開啟祈晴道場伏以秋稼方登淫雨作沴矧合宮之大禮迫季月之近期塗潦為憂寢食幾廢仰祈法力之勝時歛積雨之祥開示秋暘以成歲事下慰勤農之念上全享帝之誠謹言

太廟整漏奏告宣祖皇帝祝文

維年月日孝曾孫嗣皇帝臣名謹遣某官臣某敢昭告於宣祖昭武睿聖皇帝伏以廟室久安霖雨乘隙飭工繕治選日告虔棟宇益堅威靈無竦尚饗

後苑粉壇祈雨祝文

維年月日皇帝遣某官某請僧三七人於後苑華景亭開啟粉壇祈雨道場伏以自冬常暘涉夏未雨四方千石二麥一空惕焉不德之慙貽我丞民之病爰假佛乘之妙力大啟天竺之淨壇庶使鐘梵即交作雲雷於清晝膏澤普潤復禾黍於有秋豈獨微衷之私實亦眾志之願謹言

五岳四瀆祈雨祝文

維年月日皇帝名謹遣某官某敢昭薦於某神伏以君德不修天澤弗應自冬涉夏困於常暘失麥與禾

何以卒歲率土之廣匪神孰依雖或政令之失宜嗟彼丞庶之何罪尚祈甘雨克畀豐年衆之所同神罔終棄尚饗

謝雨祝文

維年月日皇帝名謹遣某官某敢昭賽于東嶽天齊仁聖帝伏以自冬歷春雨雪弗效由近及遠麥禾可憂懼成凶年病我赤子神明昭答膏澤普加力回大旱之餘卒致有秋之喜不腆之薦誠意斯存尚饗

鳳翔府太平宮修殿告遷太宗真宗神御祝文

維年月日孝曾孫嗣皇帝臣名謹遣某敢昭告于太宗皇帝伏以終南積高神明是宅仙廟夙設容御攸存屬當圖新敢告遷寓少祈安妥旋復故常尚饗奏告五星祈雨祝文

維年月日嗣天子名謹遣某官某敢昭告于東方歲星伏以膏澤不時咎在邦政丞庶何罪橫罹深灾惟神聰明實司造化尚需甘雨卒成豐年衆所共祈神豈弗答尚饗

天地社稷宗廟謝雨祝文

維年月日嗣天子臣名謹遣具官臣劉摯敢昭賽于

昊天上帝伏以旱始於冬半麥既病勢延於夏禾黍亦傷憂心如焚靡神不舉雖責躬而何益賴靈德之好生甘澤霽流羣穉復作民有望於饘粥國無廢於案盛仰止鴻私莫知所報尚饗

神廟寺觀謝雨祝文

維年月日皇帝遣某官某敢昭賽于某神伏以民以食爲生神以民爲主亢陽爲厲顧多匪德之慚靈雨既周終賴無私之施釋三農之憔悴復九穀於登成利澤無窮恩德何報尚饗

官瀆謝雨祝文

維年月日皇帝名謹遣某官某敢昭賽于某神乃者歲方常暘民既艱食賑倉廩而何救殫雩禱而莫聞雖懷閔雨之誠顧乏應天之實是以並走羣望靡神不宗神惟不終棄民國亦因以受賜油雲屢作甘雨俄均禾黍復生麻菽可執民既勤止朝夕耘耔之間神終相之時節風雨之至尚饗

青詞十二首

福寧殿開啟明堂預告道場青詞

維年月日嗣天子臣名請女道士二七人於福寧殿開啟明堂道場一月罷散日設醮一座一百二十分

位謹上啟元始天尊太上道君太上老君混元上德
皇帝伏以嗣守丕業于今四年躬祀總章方期再見
講魯之舊當先事于泮宮稽國之常亦豫祈于中禁
袞除祕殿祇埃真游降福儲祥望璇霄而非遠奉珪
奠幣冀釐事之有成無任懇倒之至謹詞

罷散青詞

維年月日嗣天子臣名請女道士二七人於福寧殿
罷散明堂道場設醮一座一百二十分位謹上啟元
始天尊太上道君太上老君混元上德皇帝伏以將
款合宮祇見上帝遵道家之祕錄先袞不祥企真馭

於太虛罔違誠悃錫茲祉福畀我休成無任懇倒之
至謹詞

北京南開二股河道場青詞

維年月日嗣天子臣名謹遣某官某請道士二七人
為開二股河開啟道場七晝夜罷散日設醮一座一
百二十分位謹上啟元始天尊太上道君太上老君
混元上德皇帝伏以大河西行已見歷年之久漲水
東溢疑還故道之流兵役既興民力重困顧河朔災
傷之未復惟天心惻怛以無私式遏橫流少安北道
無任懇倒之至謹詞

中太一宮祈晴青詞

維年月日嗣天子臣名謹遣某官某請道士三七人於太一宮真室殿開啟析晴道場謹上啟元始天尊太上道君太上老君混元上德皇帝伏以多稼如雲淫雨若注勢逾三日害及百嘉永惟刑政之失中顧念蒼黔之何罪矧復宗祀有日百執致功泥潦塞塗中外告病仰惟真聖之妙實司陰陽之權廓清繁雲煥發朝日屈伸俄頃變化無方使民獲收歛之功而國遂齋祠之禮永望霄極祇薦勤誠無任懇倒之至謹詞

明堂禮畢福寧殿道場青詞

維年月日嗣天子臣名請女道士二七人於福寧殿開啟明堂禮畢道場一七日罷散日設醮一座一百二十分名謹上啟元始天尊太上道君太上老君混元上德皇帝伏以因聽政之堂脩饗帝之祀陟配文考大賚四方禮成不違神貺昭荅念非寡德之致顧依妙道之餘祇被禁塗遠逆真馭誠心上達微供獲陳無任懇倒之至謹詞

罷散青詞

維年月日嗣天子臣名請女道士二七人於福寧殿

罷散明堂禮畢道場設醮一座一百二十分位謹上
啟元始天尊太上道君太上老君混元上德皇帝伏
以饗帝合宮獲成嚴父之志薦誠秘殿復陳終事之
儀靈科既脩真貺斯格肅然神光之下恍然誠意之
通明德甚微愧天心之博應神功莫測保邦祚於無
疆

景靈宮預告雅飾聖祖青詞

伏以威神在天像設有位稍經歲月寢失光儀輒因
靈科以告增飾無任懇倒之至謹詞

裝飾聖祖御容青詞

伏以真聖所依宜極華煥歲月既久必有增嚴茲因
卜日之良敢告飾工之始無任懇倒之至謹詞

雅飾了畢開啟奉安聖祖真容道場青詞

伏以靈德常新威顏有耀儼若斯民之望恍然真馭
之臨肇自殊庭卽安珍館稽首延佇降福無疆無任
懇倒之至謹詞

西岳謝雨青詞

伏以靈雨愆期農民驚顧精禱旣格神應不違牟麥
獲存禾黍可望永惟千里之澤豈獨一人之私尚終
降休迄有豐歲無任懇倒之至謹詞

中太一宮祈雨青祠二首

伏以冬雪不效春雨過期雲族屢興風災輒至牟麥
既病秋種未入嗟民何罪籲天不聞惟側身念咎之
誠不敢自赦而絜齋祈福之舊亦莫少愆庶見膏澤
之滂流尚俾饑民之粒食懇禱斯極真聖所臨無任

其二

伏以常暘爲虐夏已及中精禱未孚雨不逾尺麥雖
粗入未足充八口之饑禾則始生猶當俟三日之澤
人謀竭矣天意謂何惟至道之密微運元化於俄頃
燕閭東廡覆護邦家召呼風雲廣九千里之潤勃興

黍稷終致百室之盈永與斯民同仰靈德無任懇
之至謹詞

朱表七首

福寧殿罷散明堂預告道場朱表

臣名言絜誠致享近在外朝先事告誠祇祓中禁企
聖真於璇極嚴科式於靈場忽悅攸通福祥來暨奠
奠玉而神享迄升烟而禮成終始莫違上下蒙慶臣
無任

北京開二股河罷散道場朱表

臣名言秋水游至河流灌盈溢于北都之南疑有東

行之漸亟興兵役永念民勞仰祈幽贊之功式遏橫流之勢浮議一定疲俗再安覲洪造之無私庶微衷之不昧臣無任

明堂禮畢福寧殿罷散道場朱表

臣名言親祠之重每三歲而後成陟配之隆及中辛而既舉顧菲薄之何有賴真聖以爲依祇按靈科絜齋祕殿仙游降格神貺普存上保邦家之休下祈民物之定眇然微悃過此何求臣無任

景靈宮奏告雅飾聖祖罷散道場朱表

臣名言於赫皇祖敷佑下民眷真字之親深儼粹容之肅穆雖道存不變而體有從新既祇薦於科儀期永安於像設臣無任

景靈宮奉安聖祖真宗御容罷散道場朱表

臣名言真源永久福千世以無疆遂宇穆清延萬靈之景從肇新遺像祇薦薄誠庶資法會之功敷錫烝民之祉臣無任

西嶽罷散謝雨道場朱表

臣名言歷時不雨千里同憂顧民何知惟帝是賴精禱既應多稼獲存饘粥之餘倉廩攸實仰憑道供少答神休臣無任

諸宮觀罷散謝雨道場朱表

臣名言生靈多罪丁早暵以知窮真聖至仁視疾苦而能救不嫌屢請之黷溥施甘澤之慈禾黍復生困倉可望仰企霄漢莫報恩私臣無任

表五首

泥飾諸陵神臺奏告表

臣名言伏以威神如在陵寢無疆風雨侵尋塗丹脫落時加新飾以謹故封敢因良辰式告安宅臣無任泥飾永裕陵神臺等奏告表

臣名言伏以陵臺鞏固殿瓦峻巖雨澤浸淫丹粉墮

落恭擇良日以命衆工彩飾再完威神不壞臣無任明堂禮畢內中奏謝諸佛表

伏以躬薦微誠克終大典致周公嚴父之志達聖人享帝之能顧菲薄之何功賴僊真之垂佑歸依靡極荷戴不忘

露香表

伏以大享告成舊章不墜祗蒼昊等之既升脩文考之靈精意潛通多福荐至敢因清夜躬薦薄誠

永裕陵添修屋宇奏告表

臣名言伏以宮寢崇深廊廡缺圯敢消良日祗命衆

工庶復從新以資永固臣無任


奏斷若文臣書文職滿職滿

書章不測新若其意之臣亦前文後

尚漢不志

享守之道雖事數之可也獻斷其之無由體之觀其
外以陳獻始始其終大典隆周公禮文之志聖人
即堂斷畢內中奏摺備辦奏

奏摺備辦奏



國家圖書館, NATIONAL CENTRAL LIBRARY, TAIWAN, R.O.C

樂城集卷之三十五

宋西蜀蘇轍子由著

明東吳

王執禮子敬

全校

論時事狀三首

制置三司條例司論事狀

奏乞外任狀附

轍頃者誤蒙

聖恩得備官屬受命以來於今五月

雖勉強從事而才力寡薄無所建明至於措置大方多所未論每獻狂瞽輒成異同退加考詳未免疑惑是以不虞僭冒聊復一言竊見本司近日奏遣使者八人分行天下按求農田水利與徭役利害以為方

國家圖書館, NATIONAL CENTRAL LIBRARY, TAIWAN, R.O.C.

今職司守令無可信用欲有興作當別遣使愚陋不達竊以爲國家養材如林治民之官綦布海內興利除害豈待他人今始有事輒特遣使使者一出人人不安能者嫌使者之侵其官不能者畏使者之議其短客主相忌情有不通利害相加事多失實使者既知朝廷方欲造事必謂功效可以立成人懷此心誰肯徒返爲國生事漸不可知徒使官有送迎供饋之煩民受更張勞擾之弊得不補失將安用之朝廷必欲興事以利民輒以爲職司守令足矣蓋勢有所便衆有所安今以職司治民雖其賢不肖不可知

而衆所素服於勢爲順稍加選擇足以有爲是以古之賢君聞選用職司以責成功未聞遣使以代職司治事者也蓋自近世政失其舊均稅寬卹每事遣使冠蓋相望而卒無絲毫之益謗者至今未息不知今日之使何以異此至於遣使條目亦所未安何者勸課農桑墾闢田野人存則舉非有成法誠使職司得人守令各舉其事罷非時無益之役去猝暴不急之賦不奪其力不傷其財使人知農之可樂則將不勸而自勵今不治其本而遂遣使將使使者何從施之議者皆謂方今農事不修故經界可興農官可置輒

觀職司以下勸農之號何異於農官嘉祐以來方田之令何異於經界行之歷年未聞有益此農田之說轍所以未諭也天下水利雖有未興然而民之勞佚不同國之貧富不等因民之佚而用國之富以興水利則其利可待因民之勞而乘國之貧以興水利則其害先見苟誠知生民之勞佚與國用之貧富則水利之廢興可以一言定矣而况事起無漸人不素講未知水利之所在而先遣使使者所至必將求之官吏官吏有不知者有知而不告者有實無可告者不得於官吏必求於民不得於民其勢將求於中野興

事至此蓋已其勞此水利之說轍所以未諭也徭役之事議者甚多或欲使鄉戶助錢而官自雇人或欲使城郭等第之民與鄉戶均役或欲使品官之家與齊民並事此三者皆見其利不見其害者也役人之不可不用鄉戶猶官吏之不可不用士人也有田以為生故無逃亾之憂朴魯而少詐故無欺誑之患今乃捨此不用而用浮浪不根之人轍恐掌財者必有盜用之姦捕盜者必有竄逸之弊今國家設捕盜之吏有巡檢有縣尉然較其所獲縣尉常密巡檢常疎非巡檢則愚縣尉則智蓋弓手鄉戶之人與屯駐

客軍異耳今將使雇人捕盜則與獨任巡檢不殊盜賊縱橫必自此始轍觀近歲雖使鄉戶頗得雇人然至於所雇逃亾鄉戶猶任其責今遂欲於兩稅之外別立一科謂之庸錢以備官雇鄉戶舊法革去無餘雇人之責官所自任且自唐楊炎廢租庸調以爲兩稅取大曆十四年應干賦歛之數以定兩稅之額則是租調與庸兩稅旣兼之矣今兩稅如舊奈何復欲取庸蓋天下郡縣上戶常少下戶常多少者徭役頻多者徭役簡是以中下之戶每得休閒今不問戶之高低例使出錢助役上戶則便下戶實難顛倒失宜

不見其可然議者皆謂助役之法要使農夫專力於耕轍觀三代之間務農最切而戰陣田獵皆出於農苟以徭役較之則輕重可見矣城郭人戶雖號兼并然而緩急之際郡縣所賴飢饉之歲將勸之分以助民盜賊之歲將借其力以捍敵故財之在城郭者與在官府無異也方今雖天下無事而三路芻粟之費多取於節銀絹之餘配賣之民皆在城郭苟復充役將何以濟故不如稍加寬假使得休息此誠國家之利非民之利也品官之家復役已久議者不究本末徒聞漢世宰相之子不免戍邊遂欲使衣冠之人

與編戶齊役夫一歲之更不過三日三日之雇不過三百今世三大戶之役自公卿以下無得免者以三大戶之役而較之三日之更則今世既已重矣安可復加哉蓋自古太平之世國子俊造將用其才者皆復其身胥史賤吏既用其力者皆復其家聖人舊法良有深意以爲責之以學而奪其力用之於公而病其私人所難兼是以不取奈何至於官戶而又將役之且州縣差役之法皆以丁口爲之高下今已去鄉從官則丁口登降其勢難詳將使差役之際以何爲據必用丁則州縣有不能知丁則官戶之役

比民爲重今 朝廷所以條約官戶如租佃田宅斷買坊場廢舉貨財與衆爭利比於平民皆有常禁苟使之與民皆役則昔之所禁皆當廢罷罷之則其弊必甚不罷則不如爲民此徭役之說轍所以未諭也轍又聞發運之職今將改爲均輸常平之法今將變爲青苗愚鄙之人亦所未達昔漢武外事四夷內興宮室費用匱竭力不能支用賈人桑羊之說買賤賣貴謂之均輸雖曰民不加賦而國用饒足然而法術不正吏緣爲姦培克日深民受其病孝昭旣立學者爭排其說霍光順民所欲從而予之天下歸心遂以

無事不意今世此論復興衆口紛然皆謂其患必甚於漢何者方今聚斂之臣才智方略未見桑羊之比而朝廷破壞規矩解縱繩墨使得馳騁自由惟利是嗜以轍觀之其害必有不可勝言者矣今立法之初其說甚美徒言徒貴就賤用近易遠苟誠止於此則似亦可爲然而假以財貨許置官吏事體旣大人皆疑之以爲雖不明言販賣然旣許之以變易矣變易旣行而不與商賈爭利者未之聞也夫商賈之事曲折難行其買也先期而與錢其賣也後期而取直多方相濟委曲相通倍稱之息由此而得然至往往

敗折亦不可期今官買是物必先設官置吏簿書祿廩爲費已厚然後使民各輸其所非良不售非賄不行是以官買之價比民必貴及其賣也弊復如前然則商賈之利何緣可得徒使謗議騰沸商旅不行議者不知慮此至欲捐數百萬緡以爲均輸之法但恐此錢一出不可復還且今欲用忠實之人則患其拘滯不通欲用巧智之士則患其出沒難考委任之際尤難得人此均輸之說輒所以未諭也常平條勅纖悉具存患在不行非法之弊必欲修明舊制不過以時斂之以利農以時散之以利末斂散旣得物價

自平貴賤之間官亦有利今乃改其成法雜以青苗
逐路置官號爲提舉別立賞罰以督增虧法度紛紜
何至如此而况錢布於外凶荒水旱有不可知歛之
則結怨於民捨之則官將何賴此青苗之說轍所以
未諭也凡此數事皆議者之所詳論明公之所深究
而轍以才性朴拙學問空疎用意不同動成違忤雖
欲勉勵自効其勢無由苟明公見寬諒其不逮特賜
敷奏使轍得外任一官苟免罪戾而明公選賢舉能
以備僚佐兩獲所欲幸孰厚焉

附條例司乞外任奏狀

右臣近蒙 聖恩召對便殿面賜差使仍奉 德
音不許辭避伏自受命於今五月雖日夜勉強而
才性朴拙議論迂踈每於本司商量公事動皆不
合伏惟 陛下創置此局將以講求財利循致太
平宜得同心協力之人以備官屬而臣獨以愚鄙
固執偏見雖欲自效其勢無由臣已有狀申本司
具述所論不同事件苟 陛下因臣孤危未賜誅
譴伏乞除臣一合入差遣俾得展力州郡敢不策
勵奮鈍以酬恩私臣無任瞻 天請命激切屏營
之至

陳州爲張安道論時事書

伏以中外臣庶各有職事越職而言國有常憲臣守土陳州非有言責而輒言之計其狂愚茲實有罪然臣伏念頃以老疾不任吏事陛下未忍廢棄親擇便地以遂安養將辭之日面奉德音以爲大臣之義皆當爲國謀慮不宜以中外爲嫌有所不盡古人有言雖乃身在外乃心罔不在王室伏惟聖德廣大無所不容而臣自到任以來于今一歲心目昏眩有加無瘳故嘗乞旬餘生求還間舍區區之誠久而未獲陛下視臣志氣一衰至此豈復有意別白是非而與世俗爭議也哉是以得失之間久無所與今者竊有所懷上爲陛下參之官吏下爲陛下驗之百姓而安危之機實在於此自惟受恩累聖邦之休戚身實同之志力雖衰於義不可嘿已然臣之所欲言者非敢遠引前古逆探未然以惑陛下之聰明也凡皆陛下之所嘗試而臣愚之所與聞者耳臣伏見陛下卽位之始計慮深遠凡有所建動合天心始議山陵深卹費用之廣推明先帝薄葬之命以詔有司四方聞之無不感泣其後一年之間誕布號令勸率宗族惇孝弟之行勉勵州郡先農

藝成集

桑之政復轉對以廣言路議徭役以寬民力盛德之事不可具紀是時天下雖大變之後而無不翹然想聞德音以忘其憂兩宮歡欣九族親睦羣臣萬民蒙福而安紛紜之議不至於朝廷諂譎之聲不聞於里閭陛下優游無爲而天下已治矣爲國如此豈不樂哉陛下自今視之當日之政其可悔恨者凡有幾以臣觀之非獨陛下無所悔恨雖天下之人亦未有以爲失當者也何者政令簡易而人情之所安耳易曰易則易知簡則易從易知則有親易從則有功有親則可久有功則可大嚮使陛下推行此道始終不變則臣以爲久大之功可得而致矣其後求治太切用意過當姦臣緣隙得進邪說始議開邊以中上旨於是延安有橫山之謀保安有招誘之計陛下饒之以金帛假之以干戈小人貪功慮害不計其發深入結怨西戎攘奪尺寸無用之土空竭內府累世之積大者疲弊秦雍小者身歿寇讎西鄙騷然不寧而陛下始一悔矣然而陛下天姿英果有漢武宏達之量雖復兵更失律而立功之意未嘗少衰是以左右大臣測知此心復進財利之說陛下樂聞其利而未暇深究其害於是舉而從

欽定四庫全書

之置條例司以講求天下之遺利已酉之秋新政始
出自是以來凡所變革不可悉數其最大者一出而
爲常平青苗再出而爲揀兵併營三出而爲出錢在
役四出而爲保甲教閱四者並行於世官吏疑惑兵
民憤怨諫爭者章交於朝誹謗者聲播於市 陛
下不勝其煩爲之當宁太息日昃而不食矣然猶幸
其成功力排衆人之議而固守之天下方共厭苦而
不知其所止也而揀兵併營之策其害先見武夫凶
悍爲怨最深爲患最急 陛下知其不可於是多支
月糧復收遺卒以順適其意而 陛下旣再悔矣然

軍中之口猶復匈匈不靖 陛下雖推恩撫之而終
不以爲惠反謂 陛下畏之耳不幸邊臣失算再生
戎患帷幄之臣謀之不臧不務安之而務撓之臨遣
執政付以疆事多出金幣豫書 誥敕以成其深入
之言當此之時天下之心知其必敗矣而 陛下與
一二臣者方以爲萬舉而萬全旣而出兵無人之境
築城不守之地困弊腹心以求無益之功使秦晉之
民父子流離肝腦塗地戎人徼勅受屈已築之城隨
卽傾覆救援之兵相繼潰叛四方震動君臣宵旰而
後下罪已之詔投竄元宰以謝二鄙而 陛下旣三

悔矣夫此三者方其未悔也 陛下亦以爲是邪非邪 陛下犯逆衆心力行而不顧其必以爲是不以爲非也然而其終卒至於此然則方今 陛下之所是而未悔者無乃亦類此歟臣聞衆而不可欺者民也勇而不可犯者兵也險而不可侮者隣國也今陛下旣已欺民犯兵而侮隣國矣夫犯兵侮隣變速而禍小至於欺民則變遲而禍大變速而禍小者旣解之憂也變遲而禍大者上崩之患也今旣解之憂陛下旣知悔矣而土崩之患 陛下未以爲意此臣之所以寒心也易曰不遠復無祗悔元吉事之未

敗也 陛下不悟其非必俟其敗而後悔如向三者則 陛下之復已遠而悔亦大矣且臣觀之方今陛下下之所是而未悔者亦有三而已青苗助役保甲三者之非臣不復言矣何也言事者論其不可非一人也百姓毀壞支體燻灼耳目嫁母分居賤賣田宅以自贖免非一家也 陛下其亦知之矣徘徊而不改任民無所告訴加以水旱繼之以飢饉積憾之民奮爲羣盜浸淫蔓延滅而復起英雄乘間而作振臂一呼而千人之衆可得而聚也如此而勝廣之形成此所謂土崩之勢也臣恐 陛下至此雖欲復悔

而無所及矣故臣願 陛下取卽位之政與今日之事而試觀之天下擾擾不安孰與今日之甚羣臣交口爭辨孰與今日之衆 陛下聽覽疲勸孰與今日之多悔恨自責孰與今日之切 陛下誠以此較之則不待臣言之終而得矣可以自決矣且夫卽位之政 陛下之本心也今日之事臣下之過計也 陛下下棄卽位之本心而徇臣下之過計臣竊以爲過也 雖然臣竊聽之道路方今 陛下則亦悔之矣悔之而不變非 陛下之意也迫於建議之臣耳夫人臣進謀於其君苟事之不遂而變以爲 陛下則人主有以測其深淺人主有以測其深淺則其用捨之命在於人主此人臣之所以不便也臣竊痛 陛下爲社稷之計欲改過以安天下而怙權固位之臣持之而不釋 陛下聰明睿智廢置自我而獨爲此鬱鬱也漢宣帝與趙充國議擊匈奴魏相非之以爲當與平昌侯樂昌侯平恩侯及有識者詳議乃可此三人者非賢於趙充國也然其與國同憂樂無僥倖功名之心與期望爵賞之意則過於充國遠甚充國猶不可聽而况不如充國者哉 陛下將安民保國而與喜功伐好權利者謀之臣不知其可也臣不勝區區忘身

測其深淺人主有以測其深淺則其用捨之命在於人主此人臣之所以不便也臣竊痛 陛下爲社稷之計欲改過以安天下而怙權固位之臣持之而不釋 陛下聰明睿智廢置自我而獨爲此鬱鬱也漢宣帝與趙充國議擊匈奴魏相非之以爲當與平昌侯樂昌侯平恩侯及有識者詳議乃可此三人者非賢於趙充國也然其與國同憂樂無僥倖功名之心與期望爵賞之意則過於充國遠甚充國猶不可聽而况不如充國者哉 陛下將安民保國而與喜功伐好權利者謀之臣不知其可也臣不勝區區忘身

憂國之誠是以勢踈而言切惟 陛下察之

自齊州回論時事書

畫一狀附

臣自少讀書好言治亂方 陛下求治之初上書言

事 陛下不廢狂猶召對便殿親聞 德音九品賤

官自此始得登對論事當此之時 陛下好問之聲

震動海內愚賤之人篤信寡慮以為天下之事可得

徐陳遍舉指顧而定矣既而誤蒙 恩澤受職條例

抗論得失與有司不合得請外補於今七年而天下

之治安終未可見臣竊疑之伏惟 陛下天縱 聖

德聰明睿智不學而具其於謀慮措置曾何足云然

自頃歲以來每有更張民率不服蓋青苗行而農無

餘財保甲行而農無餘力免役行而公私金困市易

行而商賈皆病上則官吏勞苦患其難行下則衆庶

愁嘆願其速改凡此四者豈 陛下之聖明有所不

知耶臣以為非也 陛下之聖明無所不知何以言

之二年以來 陛下屢發英斷廢置大吏數其罪愆

明示臣庶凡天下之所共疾惡者 陛下無一不知

由此觀之凡天下之所共厭苦者 陛下何所不察

今言皇天悔禍啓道 聖意易置輔相中外踴躍思

觀新政而歷日彌月寂寞無聞衆心皇皇如久飢而

不得食臣雖愚陋竊獨爲 陛下恨也 陛下自卽位以來求治之心常若不及意將以堯舜之隆平易漢唐之淺陋不幸左右不明陵遲以至於此天下之人孰不知之今也既知其不可用而去之又循其舊術而不改將遂代之任咎此臣之所以爲 陛下恨也且今天下之安危智者不再計矣水旱連年死者將半遺民飢困盜賊滿野疆場未寧軍旅在外府庫空竭邊餽寡少事之可憂者何可勝數術之不效斷可見矣然 陛下獨遲遲而不決意者已爲之而已廢之恐天下有以窺其深淺耶臣聞人主之德如天

天之於物也熾然而旱赤地千里草木皆歿可謂虐矣然至雷雨時作膏澤洋溢百穀奮起民復粒食鼓舞盛德而忘旱之虐何者度量廣大改過無疑也如使密雲而不雨旣雨而中止遲疑猶豫久而不忍則天之生物盡矣傳曰君子之過也如日月之食焉過也人皆見之更也人皆仰之今 陛下誠先治其心使虛一而靜湛乎彼我得失莫能嬰也去惡如棄塵垢遷善如救飢渴與民一新罷此四事青苗之旣散者要之以三歲而不收息保甲之旣團者存其舊籍而不任事復差役以罷免役之條通商賈以廢市易

之令行之暮年而觀之苟民不安居水旱復作盜賊復起財用復竭誠有一事以憂 陛下臣請伏罔上之誅以謝左右 陛下誠不信臣數年之後親受其弊矣古人有言曰一慙之不忍而終身慙乎惟 陛下爲社稷籌之臣謹列四事之害畫一以獻不勝愚忠憤懣之誠于犯 天威伏俟鈇鉞臣輒誠惶誠恐昧死上書

附畫一狀

謹案青苗免役保甲市易四事得失最爲易見上自中外臣寮下至田父野老無有一不知者但以

朝廷所行言其是則有功言其非則有罪是以畏避鉗默不敢正言臣今謹采衆議人所共知灼然可見者畫一開坐如後

一議者皆謂富民假貸貧民坐收倍稱之息是以富人日富貧者日貧今官散青苗取息二分收富人并兼之權而濟貧民緩急之求貸不異於民間而息不至於倍稱公私皆利莫便於此然公家之貸其實與私貸不同私家雖取利或多然人情相通別無條法今歲不足而取償於來歲米粟不給而繼之以芻藁雞豚狗彘皆可以

還債也無歲月之期無給納之費出入閭里不廢農作欲取卽取願還卽還非如公家動有違礙故雖或取息過倍而民恬不知今官貸青苗責以見錢催隨二稅隣里相保結狀請錢一家不至九家坐待奔赴城市糜費百端一有逋竄均及同保貧富相迫要以皆斃而後已 朝廷雖多設法度以救其失而其實無益也

一議者又謂平時差役破壞民家一夫爲役舉家失業故使逐戶出錢官爲雇人謂之免役出錢雖多而民免於破家之患以此爲說行之不疑

然不知三代之民以力事上不專以錢近世因其有無各聽其便有力而無財者使効其力有財而無力者皆得雇人人各致其所有是以不勞而具今也棄其自有之力而一取於錢民雖有餘力不得効也於是賣田宅伐桑柘鬻牛馬以供免役而天下始大病矣且夫錢者官之所爲米粟布帛者民之所生也古者上出錢以權天下之貨下出米粟布帛以補上之闕上下交易故無不利今青苗免役皆責民出錢是以百物皆賤而惟錢最貴欲民之無貧不可得也至

如京師百司郡縣刑法之吏無祿而役爲日久矣周制度人在官雖曰有祿而事簡吏少勢或易供非如今時負數猥多不可供億况三代兵出於民而今世之兵坐而仰給若又兼舉大費爲力實難然議者以爲給之以祿然後可責之以廉蓋 朝廷選吏之精必不如擇官之慎祿吏之厚必不如祿官之多今慎擇多祿之官猶不免於貪而况於吏人乎且昔之爲法也計賊得罪無祿者減等今用倉法則吏之得罪反重於官顛倒失宜尤爲未可若 朝廷誠患吏貪

但使官得其人則吏之受賂自有分限若猶未也則雖重祿深法不能禁矣

一議者又謂三代之盛兵出於農故團結伍保以寓軍今 朝廷喜其近古亦謂可行然而三代之民受田於官官之所以養之者厚故出身爲兵而無怨今民買田以耕而後得食官之所以養之者薄而欲責其爲兵其勢不可得矣蓋自唐以來民以租庸調與官而免於爲兵今租庸調變而爲兩稅則兩稅之中兵費具矣且又有甚者民之納錢免役也以爲終身不復爲役矣

今也既已免役而於捕盜則用爲耆長壯丁於催稅則用爲戶長里正於巡防則用爲巡兵弓手一人而三役具焉民將何以堪之且其爲巡兵弓手也一保甲之中丁壯旣出老弱守舍盜賊乘間如入無人之境而其上番之期又不過旬日坐作進退未能知也代者旣至相率而反往來道路勞弊何益至使盜賊縱橫官吏蒙責嘯聚羣黨攻剽州縣未必不由此也古之循吏使民賣劍買牛今也使之棄其農具而置兵器小民無知緣以爲惡良民之畏事者一入而終身不得脫姦民之好權者一補而終身不復免其爲患害有不可勝言者矣

一議者常患百貨輕重制在富民少則貴賣以取贏多則賤買以要利利有所壅商賈難通於是置市易之官以平貴賤有司誠守此議不更別有所營則雖繁碎難行然亦未有深害今自置市易無物不買無利不籠命官遣人販賣南北放債取利公行不疑杜絕利源不與民共觀其指趣非復制其有無權其輕重而已也徒使小民失業商旅不行空取專利之名實失商稅之

利 國體卑辱海內離心巍巍 盛朝何苦於

此况復小民好利類無遠見爭取官債以救目前欺謾父兄妄引抵當期限既迫逃竄無所婦子離散行路咨嗟奈何爲此陷穽誘而納之也至於姦民巨賈窺伺間隙取利則多或輸滯積不售之貨以易見錢或指殘破無用之屋以賒實貨巧智百出難以具言有司蒙蔽指以爲利泉幣一散汗漫難收官之所藏徒文具而已竊聞 朝廷近日將議窮究然而既弊之法施行未已買賣百物猶且如故譬如含茹毒藥喉舌

破敗胸腹脹滿知其非矣然且閉口不吐安坐切脉廣求方書其於速愈之術踈矣

右臣所陳畫一事件皆是耳目所接衆庶共知

朝廷清明豈有不察若誠有意改易非復難行但朝出一紙 詔書四弊夕去非如前代積弊或在列國或在四夷欲議改更恐其動搖海內故且維持含養苟自便安今事在 朝廷出命則已衆所系望勢難久留而私自顧戀遲遲不決以失天下之心臣竊不取也愚蠢之人志在憂國言詞激切干犯典刑區區寸誠甘埃誅戮謹具狀奏 聞伏

候 敕旨

書一首

爲兄軾下獄上書

臣聞困急而呼天疾痛而呼父母者人之至情也臣雖草芥之微而有危迫之懇惟天地父母哀而憐之臣早失怙恃惟兄軾一人相須爲命令者竊聞其得罪逮捕赴獄舉家驚號憂在不測臣竊思念軾居家在官無大過惡惟是賦性愚直好談古今得失前後上章論事其言不一 陛下聖德廣大不加譴責軾任循寡慮竊恃天地包含之恩不自抑畏頃年通判

杭州及知密州日每遇物託興作爲歌詩語或輕或重向者曾經臣寮繳進 陛下置而不問軾感荷恩貸自此深自悔咎不敢復有所爲但其舊詩已自傳播臣誠哀軾愚於自信不知文字輕易迹涉不遜雖改過自新而已陷於刑辟不可救止軾之將就逮也使謂臣曰軾早衰多病必歿於牢獄歿固分也然所恨者少抱有爲之志而遇不世出之主雖齟齬於當年終欲効尺寸於晚節今遇此禍雖欲改過自新洗心以事 明主其道無由况立朝最孤左右親近必無爲言者惟兄弟之親試求哀於 陛下而已臣竊哀

其志不勝手足之情故爲冒死一言昔漢淳于公得罪其女子緹縈請沒爲官婢以贖其父漢文因之遂罷肉刑今臣螻蟻之誠雖萬萬不及緹縈而陛下聰明仁聖過於漢文遠甚臣欲乞納在身官以贖兄軾非敢望末減其罪但得免下獄死爲幸兄軾所犯若顯有文字必不敢拒抗不承以重得罪若蒙陛下哀憐赦其萬死使得出於牢獄則死而復生宜何以報臣願與兄軾洗心改過粉骨報効惟陛下所使死而後已臣不勝孤危迫切無所告訴歸誠陛下惟寬其狂妄特許所乞臣無任祈天請命激切

隕越之至



國家圖書館, NATIONAL CENTRAL LIBRARY, TAIWAN, R.O.C.

三才圖會

三才圖會
卷之二十一
十一

樂城集卷之三十一

宋西蜀蘇轍子由著

明東吳

王執禮子敬

顧天叙禮初

全校

右司諫時論事十首

論臺諫封事階中不行狀

元祐元年二月十四日

右臣伏見

皇帝陛下以至孝純仁承統踐阼

太

皇太后陛下以聰明睿智親攬庶政

一聖協德以

幸天下曾未暮歲而敝事稍去寬政復行元元之民

免於流離之患蒙更生之福海內釋然無意外之憂

不勝幸甚伏惟

陛下恭勤祇畏發於天性猶復選

國家圖書館, NATIONAL CENTRAL LIBRARY, TAIWAN, R.O.C.

於群臣增廣諫員求直言以自助天下之士聞風相
慶臣實何人得於今日備位於此然臣聞帝王之治
必先正風俗風俗既正中人以下皆自勉以爲善風
俗一敗中人以上皆自棄而爲惡中人自勉於善則
人主耳目衆多易與爲治中人自棄於惡則臣下朋
黨蕃殖易以爲非蓋邪正盛衰之源未有不始於此
者也昔真宗皇帝臨馭羣下獎用正人一時賢雋爭
自託於明主孫奭戚綸田錫王禹偁之徒既以諫諍
顯名則忠良之士相繼而起其後毫期厭事丁謂乘
間將竊國命而風俗已成朝多正士謂雖懷女惡而

無與同惡謀未及發旋卽流放 仁宗皇帝仁厚淵
嘿不自可否是非之論一付臺諫孔道輔范仲淹歐
陽脩余靖之流以言事相高此風旣行士耻以鉅口
失職當時執政大臣豈皆盡賢然畏忌人言不敢妄
作一有不善言者卽至隨軛屏去故雖人主寬厚而
朝廷之間無大過失及 先帝嗣位執政大臣變易
祖宗法度下至小民皆知其非而卿士大夫從風而
靡則風俗之變於此見矣是時惟有呂誨范鎮等明
言其失二人旣已得罪臺諫有以一言及之者皆紛
然逐去由是風俗大敗無一人復正言者天佑皇室

啓迺聖德臨政未幾而以言路爲急天下竦然思見祖宗遺俗然臣自至闕廷聞臺諫封事一切留中不出旣不施行又無黜責臣不勝憂疑夫 朝廷所以待臺諫者不過二事言當則行不當則黜其所上封事除事干幾密人主所當獨聞須至留中外並須降出行遣上所以正朝廷之紀綱使無廢職業下所以全人臣之名節使無負公議若當而不行不當而不黜則上下苟且廉耻道廢風俗衰陋國將從之臣願陛下永惟邪正盛衰之漸始於臺諫修其官則聽其言言有不當隨事行遣大者可黜小者可罷使風俗

一定忠言日至 陛下垂拱於上羣臣肅雍於下
太平之治可立而待也惟 陛下留神省察天下幸甚謹錄奏 闕伏候 敕旨

久旱乞放民間積欠狀 十五日

右臣伏見 陛下以久旱憂勞禱請勤至自冬歷春天意未答宿麥枯瘁灾害廣遠民自近歲皆苦於重斂儲積空匱若此月不雨饑饉必至盜賊必起保甲之餘民習武事猖狂嘯聚爲患必甚而 陛下所以應天動民未有其實臣竊見去年 赦書蠲免積欠止於殘零兩稅至於官本債負出限役錢皆不得除放

民有破蕩家產父子流離衣食不繼有死而不可得者買撲酒坊先因實封投狀爭氣務勝競設高價既得之後利入微細不能出辦違限不納加以罰錢至於籍沒家產桮械生蠟虱而不得脫者臣願陛下降哀痛之書應今日以前民間官本債負出限役錢及酒坊原額罰錢見今資產耗竭實不能出者令州縣監司保明除放使民得再生以養父母妻子朝廷奔捐必不可得之債以收民心民心悅附甘澤可致雖使天道幽遠雨不時應而仁澤流溢亦可以化服強暴消止盜賊臣謹案漢書文景宣元之間憂民

之疲病每歲輒弛租稅減筭賦自損以厚下民戴其澤中遭王莽之變皆謳吟思漢漢已絕而復續夫漢世平安之日猶蠲必得之常賦以惠民而況當今旱勢未止災害方作前件欠負皆勢不可得柰何斬而不與哉伏願陛下斷自聖心特降手詔無使有司吝於出納以廢格聖澤則天人不遠宜有善應謹錄奏聞伏候勅旨

貼黃臣竊見近年貪刻之吏習以成風上有毫髮之意則下有丘山之取上有滂沛之澤則下有涓滴之施如先帝向時爲瀘南用兵兩川應副疲

免疎略及小有差誤執政大臣豈有不知若公心共濟卽合據光所請推行大意修完小節然後行下今但備錄劄子前坐光姓名後坐 聖旨依奏其意可知自今以往其必有人借中外異同之論以搖動大議臣願 陛下但思 祖宗以來差役法行民間有何患害近歲旣行免役民間之蔽耳目厭聞卽差役可行免役可罷不待思慮而決矣伏乞將臣此奏留中不出時賜省覽苟大法旣正縱有小害隨事更張年歲之間法度自備臣疎遠小臣初蒙擢用輒此深言罪在不赦但念臣初無左右之助諫垣之命出自

臣竊料此事旣行民間鼓舞相慶如饑得食如旱得雨比之去年罷導洛市易鹽鐵等事其喜十倍非至仁至聖至明至斷誰能行此然臣有愚慮蓋 朝廷自行免役至今僅二十年官私久已習慣今初行差役不免有少齟齬不齊譬如人有重病不治必死醫者用藥攻療必有瞑眩不寧要須病去藥消然後乃得安樂今中外用事臣寮多因新法進用旣見 朝廷革去宿弊心不自安必因差役之始民間小有不便指以爲言眩惑聖聰敗亂仁政兼臣竊觀司馬光前件劄子條陳差役事件大綱已得允當然其間不

免踈略及小有差誤執政大臣豈有不知若公心共濟卽合據光所請推行大意修完小節然後行下今但備錄劄子前坐光姓名後坐 聖旨依奏其意可知自今以往其必有人借中外異同之論以搖動大議臣願 陛下但思 祖宗以來差役法行民間有患害近歲旣行免役民間之敝耳目厭聞卽差役可行免役可罷不待思慮而決矣伏乞將臣此奏留中不出時賜省覽苟大法旣正縱有小害隨事更張年歲之間法度自備臣竊遠小臣初蒙擢用輒此深罪在不赦但念臣初無左右之助諫垣之命出自

聖意不敢自同它人更存形迹冒昧陳聞惟 陛下裁幸謹錄奏 聞伏候 勅旨

貼黃臣竊詳差役利害條目不一全在有司節次修完近則半年遠亦不過一年必有成法至於鄉戶不可不差役錢不可不罷此兩事可以一言而決緣所在役錢寬剩一二年間必未至闕用從今放免理在不疑前來司馬光文字雖有役錢一切竝罷之文又却委自州縣監司看詳有無妨礙臣竊慮諸路爲見有此指揮未敢便行放罷依舊催理則凶歲疲民無所從出或致生事欲乞特降手

詔大略云 先帝役法本是一時權宜指揮施行
歲久民間難得見錢已詔有司依舊差役所有役
錢除坊郭單丁女戶官戶寺觀依舊外其餘限詔
到日竝與出榜放免其去年已前見欠役錢具數
聞奏未得催理聽候指揮

論蜀茶五害狀

二十四日

右臣伏見 朝廷近罷市易事不與商賈爭利四民
各得其業欣戴聖德無有窮已唯有益利秦鳳熙河
等路茶場司以買賣茶虐言四路生靈又以茶法影
蔽市易販賣百物州縣監司不敢何問爲害不細而

朝廷未加禁止臣聞五代之際孟氏竊據蜀土國用
徧狹始有權茶之法及 藝祖平蜀之後放罷一切
橫歛茶遂無禁民間便之其後淳化之間牟利之臣
始議掇取大盜王小波李順等因販茶失職窮爲剽
劫凶燄一扇兩蜀之民肝腦塗地久而後定自後
朝廷始因民間販賣量行收稅所取雖不甚多而商
賈流行爲利自廣近歲李杞初立茶法一切禁止民
間私買然猶所收之息止以四十萬貫爲額供億熙
河至劉佐蒲宗閔提舉茶事取息太重立法太嚴遠
人始病是時知彭州呂陶奏乞改法只行長引令民

自販茶每茶一貫出長引錢一百更不得取息得旨
依奏民間聞之方有息肩之望又却差孫迥李稷入
川相度始議極力掊取因建言乞許茶價隨時增減
茶法既有增減之文則取息依舊由是息錢長引二
說並行而民間轉不易矣而稷等又益以販鹽布乃
能增額及六十萬貫反李稷引陸師閔共事又增額
至一百萬貫師閔近歲又乞於額外以一百萬貫爲
獻 朝廷許之於是奏乞於成都府置都茶場客旅
無見錢買茶許以金銀諸貨折博遂以折博爲名多
遣公人牙人公行拘攔民間物貨入場賤買貴賣其

害過於市易又以本錢質與諸物公違條法欺罔

朝廷蓋茶法始行至今法度凡四變矣每變取利益
深民益困弊然供億熙河止於四十萬貫其餘以供
給官吏及非理進獻希求恩賞而害民之餘辱國傷
教又有甚者夫遂州通判本以按察吏民諸縣令佐
亦以撫字百姓而計筭息錢均與牙僧分利至於監
茶之官發茶萬馱卽轉一官知縣亦減三年磨勘國
之名器輕以與人遂使貪冒滋章廉耻不立深可痛
惜又案盜賊之法贓及二貫止徒一年出賞五貫今
民有以錢八百私買茶四十斤者輒徒一年出賞三

十貫又遞鋪文字事千軍機及非常盜賊急脚遞日行四百里馬遞日行三百里違二日者止徒一年今茶遞往還日行四百里違一日輒徒一年立法太深苟以自便不顧輕重之宜蓋造立茶法皆傾險小人不識事體但以遠民無由伸訴而它司畏憚不敢辯理是以公行不道自始至今十餘年矣臣竊聞朝廷近日察知其弊差官體量然猶恐未知其詳臣今訪聞稍得其實謹具條件五害如左

其一曰益利路所在有茶其間印蜀彭漢綿雅洋等州興元府三泉縣人戶以種茶為生自官權茶以來

以重法脅制不許私賣抑勒等第高秤低估通年

價見今止得舊價之半乞委所差官取權茶至今通年所估價例對定即見的實

茶官又於每歲秋成糴米高估米價強俵茶戶謂之

茶本假令米石八百錢即作一貫支俵仍勒出息二

分春茶既發茶戶納茶又例抑半價兼壓以大秤所

損又半謂之青苗茶元條園戶茶一百斤許收十斤市例內一半入官一半用饒潤

空旅今逐場一百斤有收至二十餘斤出剩者往往却偽作園戶中茶虛旁支出官錢入已近年印州常有此獄又有見出剩數多陰與客及至賣茶本法止

許收息二分今多作名目如牙錢打角錢之類至收

五分以上買茶商旅其勢必不肯多出價錢皆是減

價虧損園戶以求易售又昔日官未權茶園戶例收晚茶謂之秋老黃茶不限早晚隨時卽賣權茶之後官買止於六月晚茶入官依條毀棄官既不收園戶須至私賣以陷重禁此園戶之害一也

其二曰川茶本法止於官自販茶其法已陋今官吏緣法爲姦遂又販布販大寧鹽販籠器等物并因販茶還脚販解鹽入蜀所販解鹽仍分配州縣多方變賣及折博雜物貨爲害不一及近歲立都茶場緣折博之法拘攔百貨出賣收息其間紗羅皆販入陝西奪商賈之利至於買賣之餘則又加以質當去年八

九月間爲成都買撲酒坊人李安典糶米一萬貫每斛出息八錢半年未贖仍更出息二分其它非法類皆如此今四方蒙頌 聖恩罷去市易抵當之弊而中茶官獨因緣茶法潛行二事使西南之民獨不蒙惠澤此平民之害二也

其三曰昔官未權茶陝西商旅皆以解鹽及藥物等入蜀販茶所過州軍已出一重稅錢及販茶出蜀兼帶蜀貨沿路又復納稅以此省稅增羨今官自販茶所至雖量出稅錢比舊十不及一縱有商旅與販諸處稅務畏憚茶司又利於分取息錢例多欺詐以稅

為息由此省稅益耗假有作稅錢上曆歲終又不撥

還轉運司但添作茶官歲課公行欺罔訪聞元豐七年八月陸師

閱劄子奏茶司全年課利內有一項係茶稅錢又茶官違法販賣百物商旅

不行非唯稅虧兼害酒課蜀中舊使交子惟有茶山

交易最為浩瀚今官自買茶交子因此價賤舊日蜀人利交

子之輕便一貫有賣一貫一百者近歲止賣九百以上此省課之害三也

其四曰蜀道行於溪山之間最號嶮惡般茶至陝西

人力最苦元豐之初始以成都府路廂軍數百人貼

鋪般運不一二年死亡略盡茶官遂令州縣和雇人

夫和雇不行即差稅戶其為搔擾不可勝言劉庠知永興日

有澤州般茶人以疲勞不堪告訴庠令取狀在案判云候本府顧人般茶日呈後來永興即不曾雇人

後遂添置遞鋪十五里輒立一鋪招兵五十人起屋

六十間官破錢一百五十六貫益以民力僅乃得成

今已置百餘鋪矣若二百鋪皆成則是添兵萬人衣

糧歲費二十萬貫見招填不足旋貼諸州廂軍逐州

關人百事不集又茶遞一人日般四馱計四百餘斤

回車却載解鹽往還山行六十里稍遇泥潦人力不

支逃匿求死嗟怨滿道至去年八九月間劔州劔陽

一鋪人全然走盡公路號茶鋪為納命場此遞鋪之

害四也

其五曰陝西民間所用食茶蓋有定數茶官貪求羨息般運過多出賣不盡逐州多虧歲額遂於每斤增價俵賣與人元豐八年鳳州准茶官指揮每茶一斤添錢一百其餘州郡准此可見又茶法初行賣茶地分止於秦鳳熙河今遂東至陝府侵奪蠟茶地分所損必多此陝西之害五也

五害不除蜀人泣血無所控告臣乞 朝廷哀憐遠民罷放榷法令細民自作交易但收稅錢不出長引止令所在場務據數抽買博馬茶勿失 朝廷武備而已如此則救民於網羅之中使得再生以養父母

妻子不勝幸甚如 朝廷以為陝西邊事未寧不欲頓罷茶事即乞先弛榷禁因民販茶正稅之外仍收長引錢一歲之入不下數十萬貫以見今長引錢數計之可見而

商旅通行東西諸貨日夜流轉所得茶稅雜稅錢及酒課增羨又可得數十萬貫以未榷茶以前及榷茶後來年分自蜀至陝西而罷置茶遞無養兵衣糧及官吏緣

茶所費息錢食錢之類其數亦自不少則榷茶可罷灼然易見若異日西邊無事然後更罷長引錢如舊收稅而止然臣再詳師閔所營茶利雖使之裒歛一如數止於二百萬貫無復贏餘矣若以前件茶引

茶稅雜稅酒課等錢約七八十萬貫折除卽止約有利一百二千餘萬貫若更除茶遞養兵衣糧及官吏緣茶所費約三四十萬貫卽是師閔百端非理凌虐細民止得八十萬貫前件兩項錢並且從小約計故師閔所得利有八十萬貫若依實計之恐不得及此數假令萬一蜀中稍有饑饉之灾民不堪命起爲盜賊或如淳化之比臣不知朝廷用兵幾何費錢幾何殺人幾何可得平定今但得七八十萬貫錢置此不慮臣竊惑也兼臣訪聞陸師閔去年自成都移治永興仍取成都供給有本府衙前楊日新者爲之賣酒至十一月中師閔自覺非法始移牒永

興成都止就用永興供給其違法差衙前賣酒及請過成都供給卽不曾舉覺其貪冒無耻一至如此亦乞令所差官便行體量如是詣實乞重行黜謫以慰遠方積年之憤謹錄奏 聞伏候 勅旨

貼黃陸師閔久擅茶事欺罔 朝廷奏請如意爲吏民所畏憚若留在本職雖特遣使命恐必難以體量實害欲乞先罷師閔職任及利州路轉運使蒲宗閔昔同建議榷茶曾竊冒恩賞顯有妨礙亦乞指揮不得同簽書體量事所貴官吏不憂後害敢以實告

乞更支役錢雇人一年候修完差役法狀

右臣伏見二月九日三省樞密院劄子節文應天下免役錢一切竝罷其諸色役人竝依熙寧元年以前舊法人數定差更乞指揮諸縣官吏看詳若依今來指揮別無妨礙即便依此施行若有妨礙致施行未得限教到五日內具利害擘畫申本州本州限一季聞奏奏到各隨宜脩改奉 聖旨依奏臣看詳上件指揮大綱已得允當其間節目頗有疎略差悞未易一一具言全在有司節次修完近見開封府奏開祥兩縣於數日之內依舊役法人數差到役人臣竊惟

自罷差役至今僅二十年作此施行吏民皆未習慣兼差役之法關涉衆事根牙盤錯行之徐緩乃得詳審若不窮究首尾忽遽便行但恐既行之後別生諸弊臣竊見州縣役錢所在例有積年餘剩今年夏料雖已放罷舊餘剩錢猶足支數年欲乞 朝廷指揮

將見在役錢且依舊雇役盡今年而止却於今年之內催督諸處審議差役令的確可行更無弊害然後於今冬迤邐差撥起自來年役使鄉戶一則差役條貫既得審詳既行之後無復人言二則將已納役錢一年雇役民力紓緩進退皆便臣深恐諸道以爲

朝廷已行之命降到卽行雖有妨礙更不陳述致差役之條未盡其利若 朝廷以臣此言可用欲乞下三省疾速施行謹錄奏聞伏候 勅旨

貼黃新法已來減定役人皆是的確數目行之十餘年並無闕事則舊法人數決爲冗長天下共知况近降指揮明使州縣相度有無妨礙至於揭簿定差亦無日限今來開封府官吏更不相度申請於數日之間一依舊法人數差撥了絕如壇子之類近年以剩員克者一例差撥役人監勒開祥兩縣迅若兵火顯是故欲擾民以害成法尚賴百姓久苦役錢乍獲復舊更無詞說不爾必須爭訟紛紜爲害不小乞下所司取問開封官吏明知有上件妨礙更不相度申請及似此火急催督是何情意特賜行遣以戒天下挾邪壞法之人

乞選用執政狀 二十七日

右臣聞唐柳伉一太常博士耳猶能上疏乞斬程元振郇謨一布衣耳猶能哭市以論元載今臣備位諫省逢時艱危若隱忍不言實負天下謹冒斧鉞之誅以論其大者惟 陛下哀憐財幸今 皇帝陛下富於春秋 太皇太后陛下以女主稱制四夷未服積

弊如麻 陛下以爲此何時也賈誼有言抱火措之積薪之下而臥其上火未及然因謂之安正今日之謂也自 先帝以雄才大略躬攬萬幾而西北二虜交趾瀘蠻常擾邊境以勞王師京東河北福建等路姦猾巨盜常殺官吏以謀不軌今 二聖拱默恭已無爲責成於執政大臣大臣又皆媮合苟容無足賴者昔淮南王反獨畏衛青汲黯至公孫丞相若發蒙耳臣觀今之大臣尚未及公孫丞相遠甚 陛下以謂蠻夷戎狄所服者何事姦猾巨盜所畏者何人萬一有之將何以待謹按左僕射蔡確儉佞刻深以獄

吏進右僕射韓縝織闇性暴才踈行汙樞密使章惇雖有應務之才而其爲人難以獨任門下侍郎司馬光尚書左丞呂公著雖有憂國之志而才不迫心至若張璪李清臣安燾皆斗筭之人持祿固位安能爲有安能爲無 陛下必謂此等皆 先帝舊臣不欲罷去然不知 先帝以絕人之資獨運天下特使此等行文書赴期會而已至於大政事大議論此等何嘗與聞小有罪犯輒罰銅門謝爲天下笑 先帝若以股肱待之不應如此今 陛下深居帷幄之中不自任事而以天下之大付之此等其爲禍福未可與

先帝同日而語也昔漢武帝以車千秋爲丞相至於受遺輔少主則不以屬千秋必得霍光金日磾而後可先帝若自知降年止此豈肯以王珪蔡確之流受顧命之託乎陛下新臨天下人材衰少此數人者未可一朝而去也則願擇其任最重而罪最大者去之臣以爲莫如蔡確韓縝者也陛下卽位以來罷市易堆塚場及鹽茶鐵法此蔡確之所贊成也放散脩城人夫罷保甲保馬等事此韓縝與宋用臣張誠一等所共建也先帝之所是確等亦是之陛下下之所否確等亦否之隨時翻覆略無愧耻天下傳

笑以爲口實而朝廷輕矣先帝時有司屢言有賊罪有狀先帝隱忍未發不謂陛下卽位拔擢至此天下有識所共疑怪近者每發一政三省密院議論紛然至忿爭殿上無所適從皆由大臣才短望輕以至於此所有確縝其餘罪惡臣未敢細陳先論其大體伏願陛下思祖宗付囑之重深察方今事勢爲至艱至危之時早賜罷免確縝二人別擇大臣負天下之重望有過人之高才而忠於社稷有死無二者以代之上以肅正羣臣異同之論下以彈壓四海姦雄之心然後陛下高枕而臥天下無事矣

臣位卑言深罪當萬死若蒙降黜其甘如薺如其未也則當節次奏請伏閣力爭以決去就非獨臣如此凡在臺諫莫不當然必無備禮一言不行而止者此天下公議非臣私意惟 陛下裁酌早賜施行謹錄奏 聞伏候 敕旨

乞罷左右僕射蔡確韓縝狀

閏二月一日

臣頃論奏蔡確韓縝才不足用及多過惡乞賜罷免至今未見施行確近已上章求退而縝安然未去意臣恐 陛下隱忍不決久失天下之望竊惟先帝在位僅二十年勵精政事變更法度將以力致

太平追復三代是以擢任臣庶至有起於小臣十餘年間致位公相用人之速近世無與比者究觀 聖意本欲求賢自助以利安生民為社稷長久之計夫豈欲使左右大臣媮合苟容出入唯唯危而不持顛而不扶竊取利祿以養妻子而已哉然自法行已來民力困敝海內愁怨 先帝晚年寢疾彌留照知前事之失親發德音將洗心自新以合天意而此志不遂奄棄萬國天下聞之知前日敝事皆 先帝之所欲改息慕 聖德繼之以泣是以 皇帝踐阼聖母臨政奉承遺旨罷道洛廢市易損青苗止助役

寬保甲免買馬放修城池之役復茶鹽鐵之舊黜吳居厚呂孝廉宋用臣賈青王子京張誠一呂嘉問蹇周輔等命令所至細民鼓舞相賀臣愚不知朝廷以爲此數事者誰之過也上則大臣蔽塞聰明逢君於惡下則小臣貪冒榮利奔競無耻二者均皆有罪則大臣以任重責重小臣以任輕責輕雖三尺童子所共知也今朝廷旣以罷黜小臣至於大臣則因而任之將復使燮和陰陽陶冶民物臣竊惑矣竊惟朝廷之意將以體貌大臣待其愧耻自去以全國體今確續自山陵已後猶端然在職不肯引咎辭位以

謝天下臣謹案確續受恩最深任事最久據位最尊獲罪最重而有覲面目曾不知愧確等誠以昔之所行爲是耶則今日安得不爭以昔之所行爲非耶則昔日安得不言窮究其心所以安而不去者不過以爲是皆先帝所爲而非吾罪也夫爲大臣忘君狗已不以身任罪戾而歸咎先帝不忠不孝寧有過此臣竊不忍千載之後書之簡策大臣旣自處無過之地則先帝獨被惡名此臣所以痛心疾首當食不飽至於涕泗之橫流也確等皆碌碌常才無過人之實朝廷將取其德則不聞其孝弟可稱將取其

才則不聞其功業可紀將取其學則不聞其經術可
師徒以悅媚上下堅固寵祿 陛下何不正確績之
罪上以爲 先帝分謫下以慰天下之望今獨以法
繩治小臣而置確績大則無以顯揚 聖考之遺意
小則無以安反側之心故臣竊謂大臣誠退則小臣
非建議造事之人可一切不治使得革面從君竭力
自効以洗前惡臣不勝狂愚忘身爲國乞宣示此疏
使確績自處進退之分臣雖萬死不以爲恨謹錄奏
聞伏候 勅旨

貼黃臣竊觀蔡確所上表雖外迫人言若欲求退
而論功攘善實圖自安所云收拔當世之耆艾以
陪輔王室者臣謂當世之耆艾乃確昔日之所抑
遠者也所謂蠲省有司之煩碎以慰安民心臣謂
有司之煩碎乃確昔日之所創造者也此二事皆
確爲相無狀以累 先帝之明非 陛下卓然獨
見孰能行此確旣不自引咎又反以爲功著之表
疏傳之天下則是確等所造之惡皆歸 先帝而
陛下所行之善皆歸於確臣不勝憤懣乞賜詳酌
施行

乞罷蔡京開封府狀 二日

右臣近奏乞取問開封府官吏明知熙寧以前舊法役人數目顯有冗長亟不依近降指揮相度申請便盡數差撥及朝旨本無日限輒敢差人監勒於數日內感迫了當故意擾民以壞成法乞賜行遣以戒天下挾邪壞法之人至今未蒙施行謹按權知開封府蔡京職在近侍身為民害若不知舊法人數之冗是不才若知而不請是不忠京新進小生學行無聞徒以王安石姻戚蔡確族從因緣幸會以至於此近者段繼隆公事道路皆知其私徇繼隆出於胥史兄弟數人布列三省京嘗為檢正官與此輩狎暱繼隆

賊汙顯露理在不疑而大理寺官吏畏避觀望數月不決今者方欲推行差役舊法王畿之政為天下表儀而使懷私之人竊據首善之地四方瞻望何所取法乞賜指揮先罷京開封府仍勅大理寺疾速結絕前件公事所貴官吏不至觀望首鼠以長姦私謹錄奏聞伏候勅旨

乞罷右僕射韓縝劄子 六日上殿

臣伏見陛下采聽羣言罷左僕射蔡確中外釋然具知朝廷清明邪正曲直不可復欺而右僕射韓縝獨端然據位略無動意衆情疑惑臣忝備諫官不

敢默已謹按韓縝才質凡鄙性氣麤暴文學政事舉無寸長比之蔡確遠所不及 陛下聖明必無賢縝之理特以 先帝新棄天下未欲從外別擢宰相不免循例以次遷補今已逾年卽位改元政令一新確旣已罷去而縝任遇如故是以衆議紛紛未肯弭服 聞韓縝家法不正雖其父子不能相安涖官猛暴至以酖醢鞭殺指使過惡雖著而無與國事臣不敢一一煩言至如縝昔奉使定契丹地界舉 祖宗山河七百餘里以資敵國坐使中華之俗陷沒戎狄虜得乘高以瞰并代 朝廷雖有勁兵良將無所復施

其後擢爲樞密使職在安邊而西戎無釁用兵深入至使諸將敗衄前後喪師數十萬衆天下疲弊帑廩空竭雖得蘭州及安疆米脂等五寨地而厲階一生至今爲梗存之則耗蠹中國爲禍日深棄之則戎人不請無緣強與遂使 朝廷皇皇議論經年不知所出而縝曾無計以救前失據縝二罪雖伏斧質以謝天下不爲過也而况備位宰相以來怙勢作威任情不法羣下洶洶側目畏之宗道宗古皆縝之親姪縝任在中書職當進擬並引二姪同升列卿因臺官彈奏始自舉覺各與降等差遣 朝廷知其不可信任

遂令三省自此同書進擬縝之兄絳移守北京知父子無同領帥權之理而乞以其子宗師同管句安撫司公事知轉運判官以按察已而乞以所親信人杜純爲之壞法亂紀莫斯爲甚縝公行私意廢法徇兄以行其言父子同領大權古無此事惟東晉之衰司馬道子與其子元顯共執國政自非季世安有此例賴陛下聖明抽回指揮若其不然遂爲四方口實臣又竊觀言事之官每有論奏縝事縝陰懷忮恨不拘久近或罷其言職或因事責降必報而後已先帝朝翟思爲臺官言縝在樞府令所轄邊將買馬虧

價自羣牧司遷官盜取公使家事不還先帝隱忍不行翟思近以司業作詩失韻非有大過而縝遂思止知軍差遣縝初相臺官責言縝平生過惡不堪大用陛下業已用縝夫欲圖縝長其彼言除降國子司業雖似遷擢實奪其言事之權是以羣臣震懾不敢悟鎮臣知今日言縝異日縝必報臣然自念起於遷逐之餘誤蒙聖恩收拔至此不敢上負朝廷下辜公議是以爲國排姦有死無二惟陛下裁察取進止

乞招河北保甲充軍以消盜賊狀

十四日